

John He Likha Bhal Khobor

Kotha To Mangso Hoise

¹ Shuru te Kotha asele, aru Kotha to Isor logote thakise, aru Kotha he Isor ase. ² Etu shuru pora Isor logote he thakise. ³ Sob jinis Tai pora he bonaise, aru ki bonaise Tai nathaki kene eku bhi bona nai. ⁴ Tai logote jibon asele, aru jibon to manu khan laga pohor asele. ⁵ Aru pohor to andhera te ujala korise, aru andhera to pohor ke jitibo para nai. ⁶ Isor pora pathai diya ekjon manu asele, jun laga naam John thakise. ⁷ Tai gawahi hoi ahise, pohor laga kotha jonai dibole, aru sob Tai dwara biswas kori bole. ⁸ John nijor to pohor nohoi, kintu tai pohor laga gawahi dibole ahise. ⁹ Sob manu ke pohor dibole asol pohor duniya te ahi thakise. ¹⁰ Tai duniya te thakisele, aru Tai he duniya bonaise, kintu duniya pora Taike janibo para nai. ¹¹ Tai nijor manu khan majote ahise, kintu Tai nijor manu khan pora Taike luwa nai. ¹² Kintu jiman jon pora Taike grohon korise, Tai he taikhan ke Isor laga bacha hobole adhikar dise, jun Tai naam pora biswas kori loise. ¹³ Taikhan jonom to khun pora bhi nohoi, mangso pora bhi nohoi, aru mangso itcha pora bhi nohoi, kintu Isor laga itcha pora ase. ¹⁴ Aru Kotha to gaw mangso hoi kene amikhan majote thakise. Amikhan Tai laga mohima dikhise, eneka mohima juntu Baba pora tai laga ekjon morom thaka Putro ke dise, aru

etu anugraha aru hosa pora bhorta ase. ¹⁵ John pora Tai laga gawahi dikene eneka koise, “Etu he ekjon ase Jun nimate moi koise, ‘Jun moi laga piche ahi ase, Tai to moi pora bhi bisi dangor ase, kelemane moi laga age pora Tai thakise.’ ” ¹⁶ Aru Tai bhorta hoi thaka pora amikhan anugraha uporte anugraha paise. ¹⁷ Kelemane niyom to Moses dwara anidise. Kintu anugraha aru hosa to Jisu Khrista pora he anise. ¹⁸ Isor ke kun bhi kitia bhi dikha nai. Ekjon Isor, jun Baba laga usorte bohi ase, etu ke he Tai dikhai dise.

Baptizma Diya John Laga Bhabobani

¹⁹ John laga gawahi etu ase, Yehudi khan Jerusalem sheher pora Levi dol laga purohit khan ke pathaise taike hudibole, “Apuni kun ase?” ²⁰ Tai shikar kori kene koise- “Moi Khrista nohoi.” ²¹ Aru taikhan hudise, “Nohoile apuni kun ase? Apuni Elijah ase?” Tai koise, “Moi nohoi.” Taikhan koise, “Apuni bhabobadi ase?” Aru tai jawab dise, “Nohoi.” ²² Arubi taikhan taike hudise, “Apuni kun ase? Kilekoile amikhan ke pathai diya khan ke jowab dibo lage. Apuni nijorke kun ase koi?” ²³ Tai koise, “Ami ekta awaj ase, juntu jongol te hala kori koi ase:
'Probhu laga rasta sidha koribi,'
Jineka bhabobadi Isaiah pora likhise*.” ²⁴ Aru ta te Pharisee khan pora kunba manu khan ke pathaise. ²⁵ Aru taikhan taike hudise, “Jodi apuni Khrista nohoi, Elijah bhi nohoi, aru bhabobadi bhi nohoi, to kele apuni baptizma di ase?”

* **1:23** 1.23 Isa. 40:3.

²⁶ John taikhan ke jawab dise aru koise, “Moi pani pora baptizma di thaka he ase. Kintu tumikhan majote ekjon khara ase, Junke tumikhan najane. ²⁷ Jun moi pichete ahi ase moi Tai laga juta laga rusi bhi khuli bole layak manu nohoi.”

²⁸ Etu sob to Jordan nodi laga dusra phale thaka Bethany te hoise, kun to jagate John baptizma di thakise.

²⁹ Dusra dinte Jisu tai logote ahi thaka dikhikena John koise, “Sabi, Isor laga Mer bacha, kun pora etu duniya laga paap uthai loi jable ase! ³⁰ Etu he ase, Kun laga kotha moi age pora koi dise, ‘Ekjon ami laga piche ahi ase, Jun he moi pora bhi dangor ase, kelemane moi pora poila Tai thakisele.’ ³¹ Moi bhi Taike najane. Kintu Israel manu khan logot Taike prokahit kori dibo karone moi pani pora baptizma di ahise.” ³² Aru John etu gawahi dikene koise, “Atma he paro nisena sorgo pora ahikena Tai uporte bohi juwa moi dikhise. ³³ Moi Taike najane kintu Jun he moike pani pora baptizma dibole pathaise, Tai he moike koise, ‘Jun uporte Atma ahi thaki juwa tumi dikhibo, Tai he Pobitro Atma pora baptizma dibo thaka to ase.’ ³⁴ Aru moi etu dikhi kene gawahi di ase, etu he Isor laga Putro ase.”

Jisu Pora Prothom Chela Ke Mati Luwa

³⁵ Dusra dinte John pora tai laga duijon chela ke loi kene khara thakise. ³⁶ Titia Jisu berai kene aha dikhi kene tai koise, “Sabi, Isor laga Mer bacha!” ³⁷ Titia duijon chela etu huni kene Jisu laga piche korise. ³⁸ Titia Jisu ghuri saise aru tai duijon ke dikhi kene hudise, “Tumikhan ke ki

lage?” Taikhan koise, “Rabbi, Apuni kot te thaki ase? - Etu motlob to Shika manu- Apuni kot te thake?” ³⁹ Tai koise, “Ahi kene sabi.” Taikhan jai kene Tai kot te thaki ase etu dikhise, aru etu din Tai logote thaki jaise, aru etu somoi to dos ghanta nisena asele. ⁴⁰ Duijon majote kun John laga kotha huni kene Jisu logote jaise, etu ekjon to Simon Peter laga bhai Andrew thakise. ⁴¹ Tai Simon ke bisari kene koise, “Amikhan Messiah ke pai loise,” motlob ase Khrista. ⁴² Aru taike loi kene Jisu logot anise, aru Jisu taike saikene koise, “O Jonah laga Putro Simon, tumike Kefa matibo” - dusra naam ase Peter.

Jisu Pora Philip Aru Nathaneal Ke Matise

⁴³ Dusra din Jisu to Galilee jagate jabole mon thakise, titia Tai Philip ke lok paise aru taike koise, “Ami laga piche koribi.” ⁴⁴ Philip to Bethsaida nogor laga manu asele, juntu sheher to Andrew aru Peter laga sheher asele. ⁴⁵ Jitia Philip pora Nathaniel ke paise, tai koise, “Moses laga kitab te aru bhabobadi khan he jun laga kotha likhi rakhise, etu amikhan pai loise: etu Joseph laga chokra Nazareth Jisu he ase.” ⁴⁶ Kintu Nathaniel taike koise, “Bhal bostu Nazareth pora ulabo naki?” Philip pora taike koise, “Ahibi aru sabi.” ⁴⁷ Titia Jisu pora Nathaniel Tai phale aha dikhi kene koise, “Sabi, etu hosa te Israel manu ase, tai thogai diya manu nohoi!” ⁴⁸ Nathaniel Taike koise, “Apuni moike kineka jane?” Jisu taike jowab di koise, “Philip pora tumike mata age te tumi dimoru ghas niche bohi thaka Moi

dikhise.” ⁴⁹ Nathaniel Taike jowab dise, “Rabbi†, Apuni Isor laga Chora ase! Apuni Israel laga Raja ase!” ⁵⁰ Jisu jowab te taike koise, “kelemane Moi tumike koise, ‘Moi Tumike dimoru ghas nichete bohi thaka dikhise’ kowa karone tumi biswas korise? Tumi etu pora bhi bisi dangor kaam dikhibo.” ⁵¹ Aru Jisu taike koise, “Hosa pora Moi tumikhan ke kobo, tumikhan sorgo khuli diya, aru Isor laga duth khan pora Manu laga Putro uporte aha juwa kora dikhibo.”

2

Cana Te Shadi Kora

¹ Tin din pichete, ta te shadi thakise, Cana nogor laga Galilee te, aru Jisu laga ama bhi ta te thakise. ² Aru etu shadi te Jisu aru Tai chela khan ke bhi matise. ³ Jitia draikha ros khotom hoise, Tai ama pora Taike koise, “Taikhan logote draikha ros aru nathaka hoise*.” ⁴ Kintu Jisu taike koise, “Mahila, Moi nimite aru tumi nimite etu ki ase? Ami laga somoi puncha nai.” ⁵ Tai ama pora nokorkhan ke koise “Ki hoile bhi Tai tumikhan ke koribi kobo, etu he koribi.” ⁶ Titia pathor pora bona choita pani kolsi Yehudi khan laga niyom hisab te dhulai thaka ekta jagate rakhi thakise, ekta kolsi to dui-tin metre nisena lamba thakise. ⁷ Jisu taikhan ke koise, “Kolsi te pani bhorai dibi.” Taikhan eneka bhorai dise. ⁸ Aru Tai nokorkhan ke koise, “Etu olop ulai lobi aru loijai kene kha luwa saithaka manu ke dibi.”

† **1:49** 1.49 Shika manu. * **2:3** 2.3 Yehudi khan niyom, utsov nohoile shadi nisina din khan te draikha ros loi kene alohi manu khan ke diye.

Aru taikhan eneka korise. ⁹ Titia kha luwa sa manu pora etu pani ke khai saise jun to draikha ros hoise, hoilebi etu kot pora ahise jana nai, kintu nokorkhan jun he pani anidise taikhan to jani thakise, aru kha luwa sa manu shadi koribo thaka mota ke matise. ¹⁰ Aru koise, “Sob manu prothom te bhal draikha ros diye, aru jitia bhal to khai loi kene nisa hoijai etu pichete he sosta laga draikha ros diye, kintu apuni to bhal ros etiya tak bhi rakhi ase.” ¹¹ Jisu pora Galilee laga Cana te etu prothom chihna kori kene Tai nijor mohima dikhai dise, aru chela khan Taike biswas korise. ¹² Etu pichete Tai laga ama aru bhai aru chela khan ke loi kene Capernaum te namise, aru ta te taikhan olop din thakise.

Jisu Pora Mondir Ghor Sapha Kora

¹³ Yehudi khan laga Nistar din usor ahi thakise, aru Jisu Jerusalem te jaise. ¹⁴ Aru mondoli bhitor te bail guru aru mer khan aru kabotar bikiri kori kene toka-poisa bodla-bodli kori thaka paise. ¹⁵ Aru Tai ekta chabuk bonai kene mondoli pora bail guru aru mer khan sob bahar te khedai dise, aru toka-poisa bodla-bodli kori thaka khan laga poisa sob phelai dise, aru taikhan laga mez bhi ultai dise. ¹⁶ Aru Tai paro bikiri kori thaka khan ke koise, “Tumikhan etu sob yate pora loijabi. Ami laga Baba laga ghor ke bajar jaga nabona bhi.” ¹⁷ Titia Tai laga chela khan yaad ahise ki likha asele, “Tumi laga ghor nimite josh pora he moike khotom koribo†.” ¹⁸ Titia Yehudi cholawta khan Taike koise, “Apuni ki chihna amikhan ke

† 2:17 2.17 Psa. 69:9.

dikha bo, kele koile Apuni etu kaam khan kori ase?" ¹⁹ Jisu taikhan ke jowab di koise, "Etu mondoli ke khotom kori dibi, aru Moi etu ke tin dinte aru khara kori dibo." ²⁰ Titia Yehudi khan laga cholawta khan koise, "Etu mondoli bona bole chheyalis saal lagise, aru Apuni tin dinte etu khara kori dibo?" ²¹ Kintu, Tai nijor gaw laga mondoli koi thakise. ²² Karone, jitia Tai mora pora punoruthan hoise, Tai chela khan yaad ahise, ki Tai etu taikhan ke koise, aru Jisu taikhan ke kowa kotha ke bhi aru shastro kitab ke bhi biswas kori loise.

Manu Logote Ki Ase etu Jisu He Jane

²³ Jitia Tai Nistar purbb somoite Jerusalem te ahise, bisi manu Tai kori diya asurit kaam ke dikhi kene Tai naam pora biswas kori loise. ²⁴ Kintu Jisu Tai nijor pora taikhan ke biswas kora nai kelemane Tai taikhan sobke jani asele, ²⁵ aru kunbi manu laga gawahi Taike kobo nalage kelemane manu bhithor te ki ase sob Tai jane.

3

Notun Jonom Hobo Lage

¹ Pharisee khan majote ekjon Yehudi cholawta thakise, jun laga naam Nicodemus asele. ² Tai rati te Jisu logote ahi Taike hudi kene koise, "Rabbi amikhan jane Apuni Isor pora aha ekjon hikhok ase, kelemane Isor Tai logote nathakile kunbi Apuni pora chihna dikhai diya khan koribo na paribo." ³ Jisu taikhe jowab di koise, "Moi hosa pora tumikhan ke koi ase, jodi kun

bhi notun jonom noloile, Tai Isor laga rajyo dikhi napabo.”⁴ Nicodemus Taike koise, “Ekjon manu, bura huwa pichete aru kineka jonom lobo pariyo? Tai kineka nijor ama pet te dusra bar ghushi kene jonom lobo?”⁵ Jisu jowab dise, “Moi hosa pora tumikhan ke koi ase, jitia tak ekjon pani aru Atma pora jonom nolobo, tai Isor rajyote ghushi bona pariyo.”⁶ Jun mangso pora jonom hoise, etu mangso ase, aru jun Atma pora jonom hoise etu Atma ase.”⁷ Moi ‘tumikhan notun jonom lobo lage’ kowa karone asurit nohobi.”⁸ Hawa jun phale jabole mon ase, ta te jai thake, aru tumi etu awaj huni thake, kintu etu kot pora ahise aru kot phale jabole ase etu najane, etu karone jun Atma pora jonom hoise, tineka he ase.”⁹ Nicodemus jowab dikena Taike koise, “Etu kineka hobo pariyo?”¹⁰ Jisu taike jowab dise, “Tumi Yehudi laga hikhok hoi kene bhi etu kotha bujhi bo napare?”¹¹ Moi tumike hosa kobo, Amikhan ki jane etu he koi, aru ki dikhise etu gawahi diye, kintu tumikhan Ami laga gawahi lobo napare.”¹² Jitia Moi tumikhan ke duniya laga kotha koise, aru tumikhan biswas kora nai, jodi Moi sorgo laga kotha koile tumikhan biswas koribo?”¹³ Aru kun bhi sorgote juwa nai, ekla Jun he sorgo pora ahise- Manu laga Putro.”¹⁴ Aru jineka Moses pora jongol te saph ke upor uthai dise, tineka Manu laga Putro ke bhi uporte uthabo lagibo*.”¹⁵ Etu nimate jun Taike biswas koribo, nost nohobo kintu anonto jibon pabo.

* **3:14** 3.14 Num. 21:9.

Isor He Duniya ke Iman Morom Korise

¹⁶ Kelemanee Isor duniya ke eneka morom korise, Tai nijor laga ekjon he thaka Putro ke di dise, tinehoile jun Taike biswas koribo, khotom nahobo, kintu anondo jibon pabo. ¹⁷ Kelemanee Isor duniya ke khotom kori bole nijor Putro ke patha nohoi, kintu etu karone ase, Tai karone he duniya bachibole. ¹⁸ Jun Taike biswas koribo taikhe eku golti nadibo, kintu jun Taike biswas nakoribo, etu ke golti kori dibo, kelemanee Tai Isor laga ekjon thaka Putro laga naam te biswas nakora hoise. ¹⁹ Aru golti karone bisar to etu ase, puhor to duniya te ahise, kintu manu to puhor pora bhi andhera ke bisi morom kore, kelemanee taikhan laga kaam biya ase. ²⁰ Jun biya kaam kore, tai puhor ke ghin kore, aru puhor usorte na ahe, tai ki kaam korise etu ke khuli dikhi najabo nimite. ²¹ Kintu jun hosa te thake, taikhan to Isor laga itcha pora he kori ase koi kene dikhai dibo karone puhor usorte ahe.”

Baptizma Diya John Pora Jisu Laga Sakhi Diya

²² Etu pichete Jisu aru Tai chela aru Judea desh te jai jaise, aru Tai ta te taikhan logote thaki kene baptizma di thakise. ²³ Aru John bhi Salim usor Aenon te baptizma di thakise, kelemanee ta te bisi pani thaka karone, aru taikhan ahi baptizma loi thakise. ²⁴ Aru etu somoi tak te John ke bondhi ghor te loi janai. ²⁵ Ta te John laga chela khan Yehudi manu ekjon logote Yehudi khan sapha kora niyom laga kotha nimite mon namili kene thakise. ²⁶ Aru taikhan John logote ahi taikhe koise, “Rabbi, jun Jordan nodi paar te

apuni logote thakise, jun nimate apuni kotha koi dise, sabi, etu manu baptizma di thakise, aru sob Tai logote ahijai ase.” ²⁷ John jowab dise aru koise, “Sorgo pora manu ke nadile, tai ekubi napabo. ²⁸ Apuni khan nijor ami laga gawahi dibo pare kele koile moi age te pora he koi dise, ‘Moi Khrista nohoi’ kintu ‘Tai laga age te pathai diya he ase.’ ²⁹ Jun logote shadi kora maiki ase tai he shadi kora mota ase. Aru shadi kora mota laga sathi khan pora tai usorte khara koribo aru tai laga awaj huni kene bisi khushi pabo, etu nisena ami laga khushi bhi etu pora pura hobo. ³⁰ Jisu he dangor hoi jabo lage, kintu moi komti hoi jabo lage.

³¹ Jun upor pora ahise, etu he sob laga upor ase. Jun prithibi pora ahise etu prithibi laga ase, aru prithibi laga kotha koi thake. Jun sorgo pora ase, tai he sob laga upor ase. ³² Aru Tai ki dikhise aru hunise etu laga gawahi dise, kintu kunbi Tai laga gawahi ke grohon kora nai. ³³ Jun Tai koi thaka grohon kori loi, etu manu to Isor hosa ase koi kene jani loise. ³⁴ Kelemanee kunke Isor pathai, tai he Isor laga kotha khan koi diye. Kelemanee Tai Atma ke napikena nadiye. ³⁵ Baba pora Putro ke morom kore, aru sob bostu Tai hathte di dise. ³⁶ Jun Putro ke biswas korise anondo jibon tai laga hoise, kintu jun Putro ke biswas nakore, tai to jibon nadikhibo, kintu Isor laga khong tai uporte thaki jabo.”

4

Jisu Samaria Te Juwa

¹ Aru jitia Jisu jani loise Pharisee khan pora Tai he John pora bhi bisi manu ke baptizma dikene chela bonai loise koi kene, ² - kintu Jisu pora nohoi kene Tai laga chela khan he baptizma di thakise- ³ Titia Tai Judea desh chari kene Galilee jaga phale jai jaise. ⁴ Kintu Tai Samaria jaga paar kori kene jabo dorkar thakise. ⁵ Karone Tai Samaria laga nogor, Sychar te ahise, etu jaga to Jacob pora tai laga chokra Joseph ke diya jaga usorte thakise. ⁶ Ta te Jacob laga kuha bhi thakise. Aru Jisu safar kora pora hairan koi kene etu kuha usorte bohi jaise, aru etu somoi baroh baji nisena asele. ⁷ Titia ekjon Samaria laga mahila pani lobole ahise, aru Jisu taike koise, "Moike pani khila bhi." ⁸ Etu homoi te Tai chela khan to kha luwa kini bole nogor te jai kene asele. ⁹ Titia Samaria laga mahila Taike koise, "Kineka Apuni Yehudi hoi kene moi Samaria mahila ke pani khila bhi koi kene mangi ase?" Kelemanee Yehudi khan Samaria manu khan logote eku bhi lenden nakore. ¹⁰ Jisu taike jowab di koise, "Jodi tumi Isor laga daan ke janile, aru kun pora tumike koi ase, 'Moike pani khila bhi,' titia tumi Tai logote mangibo, aru Tai tumike jibon laga pani dibole asele." ¹¹ Mahila pora Taike koise, "Sahab, Apuni logote pani ulabole baltin nai, aru kuha bhi ghalta ase. To jibon pani kot pora Apuni logote ase?" ¹² Kile, Apuni to amikhan laga baba Jacob pora bhi dangor ase naki, jun he etu kuha amikhan ke dise? Aru tai nijor bacha khan aru nijor pala janwar sob etu te khabole dise?" ¹³ Jisu taike jowab di koise, "Jun bhi etu pani khabo

aru bhi pyaas lagi jabo, ¹⁴ kintu jun bhi etu pani khabo jun to Moi pora dibo, tai kitia bhi aru pyaas nalagibo. Kintu junke Moi pani dibo tai karone ekta dhara hoi anonto jibon tak bahi thaki jabo.” ¹⁵ Etu mahila Taike koise, “Sahab, moi aru pyaas nalagibole aru pani lobole iman dur nahibole etu pani moike dibi.” ¹⁶ Jisu taike koise, “Jabi, aru tumi laga mota ke yate loi anibi.” ¹⁷ Etu mahila koise, “Moi laga mota nai.” Jisu taike koise, “Tumi ‘moi laga mota nai’ kowa to thik koise.” ¹⁸ Kelemanee tumi pans-ta mota thakisele, aru etiya jun logote tumi thaki ase etu bhi tumi laga mota nohoi kowa, tumi hosa koise.” ¹⁹ Aru mahila pora Taike koise, “Sahab, moi janise Apuni ekjon bhabobadi ase.” ²⁰ Ami laga baba khan etu porbot pora aradhana kori thakise, aru Apuni koi ase manu khan aradhana kori bole jaga to Jerusalem he hoi.” ²¹ Jisu taike koise, “O mahila, Ami laga kotha biswas koribi, tumikhan etu porbot te bhi aru Jerusalem sheher te bhi Baba ke aradhana kori bole napara somoi ahi ase. ²² Tumikhan najana ke aradhana kore, amikhan to junke aradhana kore jani kene kore, kelemanee poritran to Yehudi pora ase. ²³ Kintu somoi ahi ase, aru etiya ahise, hosa te aradhana kora khan atma pora Isor ke aradhana hobo lage, Baba eneka khan ke he bisare, jun atma te aradhana kore. ²⁴ Isor to Atma ase, aru kun Taike aradhana koribo atma aru hosa te aradhana koribo lage.” ²⁵ Etu maiki Taike koise, “Moi jani ase Massiha ahibo kotha to, junke Khrista koi, jitia Tai ahibo, Tai sob kotha amikhan ke koi dibo.” ²⁶ Jisu taike koise, “Moi he tai ase, ekjon

tumi logote kotha kori ase.”

²⁷ Titia Tai laga chela khan Tai kunba mahila logote kotha kora dikhi kene asurit hoise, kintu kun bhi Tai ki lage aru kele Jisu tai logot te kotha kori ase koi kene huda nai. ²⁸ Aru tai laga pani daba chari kene, etu mahila nogor te dauri jaise, aru manu khan ke koise. ²⁹ “Ahibi aru ekjon ke sabi, moi ki korise etu sob Tai koi dise, etu Khrista kowa to nohoi na?” ³⁰ Karone taikhan town pora ulaikene Tai logote ahise. ³¹ Etu somoite Tai chela khan Taike koise, “Rabbi, kiba khabi.” ³² Kintu Tai taikhan ke koise, “Tumikhan najana kiba kha luwa Ami logote ase.” ³³ Titia chela khan apaste kotha korise, “Kunba pora khabole kiba Taike dise na, diya nai?” ³⁴ Jisu taikhan ke koise, “Ami laga kha luwa to Moike pathai diya laga itcha ke pura kori diya to he ase. ³⁵ Kile tumikhan nokoi, ‘Kati bole aru bhi char mohina baki ase’? Sabi, Moi tumikhan ke koi ase, suku uthaikene kheti ke sabi, eitu khan kati bole paaki kene boga hoi jaise! ³⁶ Aru jun dhaan katikena nijor mojdur pabo, aru phol khan sob joma kori kene anonto jibon karone rakhidibo, titia jun manu bijon hissi dise aru jun dhaan katise, tai duijon mili anondo kori thaki jabo. ³⁷ Keleman, ‘Ekjon bijon hissi dise, aru dusra kati thake’ kowa kotha to hosa ase. ³⁸ Tumikhan pora hissi kene narakha jagate kati bole Moi tumikhan ke pathai ase. Dusra khan pora hissi dise, aru tumikhan to taikhan laga kaam ke bhag luwa he ase.”

³⁹ Aru etu sheher te thaka Samaria manu khan Taike biswas kori loise, keleman etu mahila he eneka koise, “Moi age te ki korise sob Tai moike

koi dise.” ⁴⁰ Karone jitia Samaria manu khan Tai logote ahise, taikhan pora Taike arubi taikhan logote thakibi koi kene binti korise, etu pora Tai ta te dui din rukhi jaise. ⁴¹ Aru Tai kotha pora bisi manu biswas kori loise. ⁴² Titia taikhan etu mahila ke koise, “Etiya to amikhan apuni kowa karone nohoi, kintu amikhan nijor kaan pora Taike huni loise, aru jani loise, Tai he hosa ase, duniya laga Tran-Korta ase.”

⁴³ Aru dui din pichete Tai ta te pora Galilee jagate jai jaise. ⁴⁴ Kelemanee Jisu Tai nijor koisele, ekjon bhabobadi tai nijor desh te hoile sonman napai. ⁴⁵ Jitia Tai Galilee te ahise, Galilee manu khan pora Taike khushi paikena grohon korise, ki kaam Tai purbb somoite Jerusalem te korise, taikhan etu sob dikhise kele koile taikhan bhi purbb te jaisele.

Daruga Laga Putro Ke Bhal Kora

⁴⁶ Titia Tai aru Galilee te thaka Cana te ahise, kot te Tai pani pora draikha-ros bonai disele. Ta te ekjon daruga laga chokra Capernaum te bemaar thakisele. ⁴⁷ Jitia Jisu Judea pora Galilee te ahi ahise koi kene tai hunise, tai binti loi kene Tai logote ahise, aru tai laga chokra ke bhal kori dibi koise, kelemanee tai mori bole hoi thakise. ⁴⁸ Titia Jisu taikhe koise, “Jitia tak tumikhan chihna aru asurit kaam nadikhibo, titia tak biswas nokorile.” ⁴⁹ Daruga pora Taike koise, “Sahab ami laga bacha namora age te ahibi.” ⁵⁰ Jisu taikhe koise, “Jabi. Tumi laga chokra jinda ase.” Etu manu Jisu taikhe kowa ke biswas korise, aru jai jaise. ⁵¹ Kitia tai rasta te thakise, tai laga nokorkhan polai ahi taikhe lok

paise aru koise, apuni laga chokra jinda hoise. ⁵² Aru tai taikhan ke hudise, thik ki somoite chokra to bhal hoise. Aru taikhan koise, “Juwa kali thik ek baji somoite bukhar taike chari jaise.” ⁵³ Titia tai jani loise, etu somoi Jisu taike kowa thik somoite asele, “Tumi laga chokra jinda ase.” Aru tai aru tai ghor manu sob biswas kori loise. ⁵⁴ Jisu pora Judea ke chari kene Galilee te ahise, titia tai etu dusra chihna kori dikhai diya asele.

5

Bisram Dinte Pukhuri Te Changai Kora

¹ Etu din pichete Yehudi khan laga purbb thakise, aru Jisu Jerusalem te jaise. ² Jerusalem te mer laga duar mata usorte ekta pukhuri asele, etu Ibrani kotha te Bethesda koi, ta te pansta veranda bonai rakhi sele. ³ Ta te andha, lengra, aru jothor- rugi bemar thaka khan etu pukhuri laga pani hili bole laga asha te bohi rukhi thake. ⁴ Kelemanee olop somoi pichete ekjon sorgodoth ahikena etu pukhuri te pani ke hilai diye, aru kun sob pora prothom te panite jabo, tai laga bemar bhal hoi thake. ⁵ Ta te ekjon manu artis-saal pora bemar hoi kene thakisele. ⁶ Jitia Jisu taike dikhise aru tai ta te bisi din bemar pora eneka thaka jani loise, Tai koise, “Tumi bhal hoi jable mon ase?” ⁷ Bemar manu taike jowab dise, “Sahab, pani hila somoite moike loi jable kun bhi nai, aru moi ta te jai thaka te dusra moi pora poila jai thake.” ⁸ Jisu taike koise, “Uthi kene tumi laga charpai uthai loijai jabi.” ⁹ Aru etu

kowa loge-loge te etu manu bhal hoi jaise, aru nijor chatai uthai loi aha juwa korise.

Aru etu Bisram din asele. ¹⁰ Karone Yehudi cholauta khan pora jun bhal hoise etu manu ke koise, "Aji to Bisram din ase, tumi laga charpai uthai loi juwa to niyom nohoi." ¹¹ Kintu tai taikhan ke koise, "Kun moike bhal korise, tai moike koise, "Tumi laga charpai uthai loijai jabi." " ¹² Titia taikhan hudise, "Tumike 'tumi laga charpai uthai loijabi' kowa kun ase?" ¹³ Kintu bhal hoija-a manu to etu kun ase jana nai, kelemane ta te bhir asele, etu karone Jisu ta te pora piche hati jaisele. ¹⁴ Etu pichete Jisu mondoli te taike paikene koise, "Sabi, tumi to bhal hoise! Aru etu pora bhi biya tumi uporte nahibo karone aru paap na koribi." ¹⁵ Etu manu Yehudi cholawta khan logote jai kene taike changai kori diya to Jisu ase koi dise. ¹⁶ Karone Yehudi cholawta khan Jisu ke tarona di thakise, aru Taike morai dibole bisari thakise, Tai Bisram dinte etu kaam kori diya karone. ¹⁷ Kintu Jisu taikhan ke jowab dise, "Ami laga Baba etiya tak kaam kori ase, aru Moi bhi kaam kori ase."

Jisu Aru Isor To Eke

¹⁸ Karone Yehudi cholawta khan Taike morai dibole aru bisi jor korise, kelemane Tai Bisram din laga niyom bhangai diya ekla he nohoi kintu Isor ke Tai laga Baba kowa aru Tai nijorke Isor logot borabar kora karone.

Putro Laga Adhikar

¹⁹ Titia Jisu taikhan ke koise, "Moi tumikhan ke hosa kobo, Putro nijor eku koribo napare,

kintu ki kaam khan Baba kori thaka Tai dikhe, eitu khan he Putro bhi kori thake. ²⁰ Kelemanee Baba pora Putro ke morom kore, aru ki kaam Tai kore sob to Putro ke dikhai diye, aru etu pora bhi dangor kaam khan Putro ke dikhai dibo aru tumikhan asurit hoi jabo. ²¹ Kelemanee jineka Baba mora manu ke uthai diye aru jibon diye, tineka he Putro bhi Tai junke bhal pai taike jibon diye. ²² Kelemanee Baba nijor to bisar nakore, kintu bisar kori bole sob kaam Putro ke di dise. ²³ Karone jineka sob manu Baba ke sonman kore, tineka Putro ke bhi sonman koribo, jun Putro ke sonman nakore, Taike pathai diya Baba ke bhi sonman nakore. ²⁴ Moi tumikhan ke hosa kobo jun Moike huni kene Moike pathai diya ke sonman koribo, anondo jibon tai laga hoise, aru saja laga kotha nai, kintu mrityu ke paar kori kene jibon te jai jaise. ²⁵ Moi tumikhan ke hosa kobo, mora manu Isor laga Putro laga awaj hunibo, aru jun huni lobo eitu khan jinda hoble somoi ahi ase, aru etiya ahise. ²⁶ Kelemanee jineka Baba nijor te jibon rakhe, tineka Putro ke bhi, Tai jibon rakhibole adhikar dise. ²⁷ Aru Jisu he Manu laga Putro ase, etu karone bisar laga adhikar bhi Taike dise. ²⁸ Tumikhan etu kotha karone asurit nohobi, kelemanee kobor khan te thaka sob pora Tai awaj huni kene bahar te ulai jabo. ²⁹ Aru jun bhal kaam korise, eitu khan jibon karone punoruthan hobo, jun biya kaam korise, eitu khan sajai nimate punoruthan hobo, eneka somoi ahi ase.

Jisu Laga Sakhi

³⁰ Moi nijor eku koribo napare. Jineka Moi hune, eneka bisar kore, aru Moi laga bisar hosa ase, kelemane Moi nijor itcha te nohoi kintu, Moike patha Moi Baba laga itcha te he kore. ³¹ Jodi Moi nijorke sakhi dile, Moi laga sakhi hosa nohoi. ³² Ekjon ase kun Ami laga kotha ke sakhi diye, aru Moi jane, tai pora Ami laga sakhi diya to hosa ase. ³³ Tumikhan John logote manu pathaise, aru tai hosa sakhi dise. ³⁴ Kintu Moi manu pora sakhi nalage, kintu Moi tumikhan laga udhar nimite etu koi ase. ³⁵ John to joli thaka aru jiliki thaka saaki ase, aru tumikhan tai puhor te ekbar khushi pora thaki jabo mon kori sele. ³⁶ Kintu Moi laga sakhi he John laga sakhi pora dangor ase, kelemane kaam ke pura kori bole Baba he Moike dise, kuntu kaam Moi kori ase, etu pora Baba he Moike pathaise koi kene Moike sakhi di ase. ³⁷ Aru Moike pathai diya Baba Tai nijor Moike sakhi dise, tumikhan to kitia bhi Tai awaj huna nai, aru Tai roop bhi dikha nai. ³⁸ Aru tumikhan Tai laga kotha monte narakha hoise, karone junke Tai pathaise etu ke bhi tumikhan biswas kora nai. ³⁹ Tumikhan Shastro te anondo jibon ase bhabikena bisari thake, aru etu kotha khan he Moike sakhi di ase, ⁴⁰ Kintu tumikhan jibon pabo karone Ami logote ahibole mon nai. ⁴¹ Moi manu pora adar nabisare, ⁴² Kintu tumikhan Isor ke morom nakora etu Moi jane. ⁴³ Ami Moi laga Baba laga naam to ahise, aru tumikhan Moike grohon nakore. Jodi kunba tai nijor naam te ahile, tumikhan etu ke to grohon kori lobo. ⁴⁴ Kineka tumikhan biswas koribo jitia Isor pora aha sonman ke nabisare

kene nijor apaste he bisari thake? ⁴⁵ Moi Baba usorte tumikhan ke golti lagabo eneka nabhabi bhi. Tumikhan ke golti kora to Moses ase, junke tumikhan asha rakhise. ⁴⁶ Jodi tumikhan Moses kowa biswas kori thakise koile, Moike bhi biswas koribo, kelemane tai Moi nimite likhise. ⁴⁷ Kintu jodi tumikhan tai likha ke biswas nakore, to tumikhan Ami laga kotha kineka biswas koribo?”

6

Jisu Pora Pans Hajar Ke Kha Luwa Diya

¹ Eitu khan huwa pichete, Jisu Galilee Nodi laga dusra phale jai jaise, juntu ke Tiberias Samundar bhi koi. ² Titia bisi manu Tai piche kori ahise, kelemane Tai bemari khan ke asurit chihna kaam kori diya karone. ³ Aru Jisu tilla te uthise, aru Tai chela khan logote ta te bohi jaise. ⁴ -Aru titia Yehudi khan laga Nistar purbb punchi asele.- ⁵ Jitia Jisu Tai laga suku uthaikene saise, Tai phale dangor bhir ahi thaka dikhise, aru Tai Philip ke koise, “Manu khan pora khabo karone amikhan kot pora roti kinibo paribo?” ⁶ -Kintu Tai Philip laga mon sabole tineka he koisele, kelemane Tai nijor ki koribo lage sob jane.- ⁷ Philip Taike jowab dise, “Duisoh dinari* laga roti pora ekjon ke olop-olop dile bhi naponchibo.” ⁸ Tai chela pora ekjon Simon Peter laga bhai, Andrew Taike koise. ⁹ Yate ekjon lora ase, tai logote pansta roti aru duita huru maas ase, kintu iman bisi manu karone etu pora ki koribo paribo? ¹⁰ Titia Jisu koise,

* **6:7** 6.7 Ek dinarius to ek din laga hajira thakisele.

“Manu khan ke bohai dibi.”- Etu jagah te ghas bisi thakisele. Karone manu khan ke bohai dise, aru eitu khan ginti korise aru pans hajar nisena thakise. ¹¹ Titia Jisu roti loi kene dhanyavad dise aru chela khan ke sob logot bhag kori bole dise, aru tineka maas ke bhi, aru jiman lage iman taikhan ke dise. ¹² Jitia taikhan khai loise Tai laga chela khan ke koise, “Bachi juwa kha-luwa ke joma kori lobi, kelemane eku bhi nuksan hobo nalage.” ¹³ Karone taikhan joma kori loise, aru pans-ta roti khai kene tukra bachi thaka ke baroh-ta tukri bhorta joma kori loise. ¹⁴ Titia manu khan Tai asurit kaam kori diya ke dikhi kene koise, “Etu duniya te ahibole thaka bhabobadi to hosa te bhi etu ase.” ¹⁵ Karone manu khan ahi Taike joborjosti dhori kene raja bonai dibole bhabi thaka Tai jani kene ekbar aru Tai ekla pahar te jai jaise.

Jisu Pora Samundar Pani Uporte Bera

¹⁶ Jitia saam hoise, Tai chela khan nodi kinar te jaise. ¹⁷ Aru naw te jai kene nodi paar Capernaum town phale jaise, etu somoi andhera hoise, aru Jisu titia bhi taikhan logote aha nai. ¹⁸ Titia andhi karone samundar te hawa mari bole lagise. ¹⁹ Jitia taikhan laga naw to tin nohoile chari mile nisena chari jaise titia taikhan Jisu panite khujkari kene naw usorte aha dikhise aru taikhan bhoi khaise. ²⁰ Kintu Jisu taikhan ke koise, “Moi ase! Bhoi nokoribi.” ²¹ Titia taikhan Taike naw te lobole taiyar hoise, aru joldi etu naw kot te jabole ase ta te punchi jaise.

²² Aru dusra din bhi manu khan samundar paar te thaki jaise, taikhan ta te ekta naw he

dikhise, aru Jisu to taikhan logote etu naw te ja-a nai, khali chela khan he jaise. ²³ Hoilebi, Tiberias phale pora dusra nawkhan bisi ahise, kun to jagate Probhu he roti loi Isor ke dhanyavad dikene taikhan roti khai sele. ²⁴ Jitia manu khan ta te Jisu aru chela khan ke pa-a nai, taikhan aru naw te uthijaise, aru Jisu ke bisari kene Capernaum phale ahise. ²⁵ Aru nodi paar te Taike paikene koise, "Rabbi, Apuni kitia yate ahi jaise?" ²⁶ Jisu taikhan ke jowab dise, "Moi Tumikhan ke hosa kobo, tumikhan chihna dikha karone nohoi, kintu tumikhan pet bhorta roti khabo para karone Moike bisari ase." ²⁷ Nost hobole laga kha luwa karone kaam na koribi, kintu juntu kha luwa anondo jibon tak thakibo, jun to Manu laga Putro he Tumikhan ke dibole ase, etu karone porishram koribi, kelemane Baba Isor he Tai uporte mohor lagai loise." ²⁸ Titia taikhan Taike koise, "Isor laga kaam kori bole amikhan ki koribo lage?" ²⁹ Jisu taikhan ke jowab te koise, "Etu he Isor laga kaam ase: Junke Tai pathaise, Taike biswas koribi." ³⁰ Karone taikhan Taike koise, "Tinehoile Apuni amikhan ke ki chihna dikha bo, juntu saikene amikhan Apuni ke biswas kori lobo? Apuni ki koribo?" ³¹ Amikhan laga baba khan jongol te manna khaise, 'Tai he khabole sorgo pora dise, Shastro te eneka likha ase.'" ³² Titia Jisu taikhan ke koise, "Moi tumikhan ke hosa kobo, sorgo pora roti tumikhan ke diya to Moses nohoi, kintu Moi laga Baba he hosa laga roti tumikhan ke dise. ³³ Kelemane Isor laga roti etu ase, jun

sorgo pora ahi kene duniya ke jibon di thake.”
³⁴ Titia taikhan Taike koise, “Sahab, etu roti hodai amikhan ke di thakibi.” ³⁵ Aru Jisu taikhan ke koise, “Moi he jibon roti ase; jun Moi logote ahe tai kitia bhi bhukh nalagibo, aru jun Moike biswas koribo tai kitia bhi aru pyasa nohobo. ³⁶ Kintu tumikhan Moike dikhi paise, kintu biswas nakore, etu Moi tumikhan ke koi dise. ³⁷ Baba pora jun khan Moike dise, taikhan sob Moi logote ahibo aru kun Moi logote ahibo, taike Moi kitia bhi nacharibo. ³⁸ Kelemanee Moi nijor itcha te nohoi, kintu Moike pathai diya laga itcha pora kori bole Moike sorgo pora niche anise. ³⁹ Aru Moike pathai diya Jon laga itcha etu ase, Tai kun pora Moike ki dise, eitu khan ekjon bhi naharaikena, hekh dinte sobke uthabo. ⁴⁰ Kelemanee Ami laga Baba laga itcha etu ase, jun Putro ke dikhibo, aru Taike biswas koribo, etu anondo jibon pabo aru Moi hekh dinte taike uthai lobo.”

⁴¹ Titia Yehudi khan Tai bhirodh kotha korise, kelemanee Tai koise, “Sorgo pora aha roti Moi he ase.” ⁴² Aru taikhan majote eneka hudi thakise, “Etu Joseph laga chokra Jisu nohoi, jun laga ama baba amikhan jane? Tai kele eneka koi ase, ‘Moi sorgo pora ahise?’” ⁴³ Karone Jisu taikhan ke koise, “Tumikhan apaste kotha na koribi. ⁴⁴ Moike pathai diya Moi laga Baba he loi ani nadile, kun bhi Moi logote ahibo na paribo, aru Moi hekh dinte taike uthai dibo. ⁴⁵ Bhabobadi khan pora likha eneka ase, ‘Aru taikhan sobke Isor pora sikhai lobo.’ Kun pora Baba laga kotha hunise aru sikhi loise taikhan he Moi logote

ahibo†. ⁴⁶ Kun bhi Baba ke dikha nai, khali Tai Jun Isor pora ahise- Tai he Baba ke dikhise. ⁴⁷ Moi tumikhan ke hosa kobo, jun Moike biswas koribo, tai anonto jibon pabo. ⁴⁸ Jibon laga roti Moi ase. ⁴⁹ Tumi baba laga baba khan jongol te manna khaise, aru morise. ⁵⁰ Etu roti to sorgo pora nichete ahise, aru manu khan etu khabo hoile bhi namoribo. ⁵¹ Sorgo pora aha jibon laga roti Moi ase. Jodi kunba etu roti khabo, tai anondo jibon pabo, aru ki roti jibon karone Moi duniya ke dibole ase, etu Moi laga mangso ase.”

⁵² Etu huni kene Yehudi khan apaste kotha namila hoise, “Etu manu kineka kori Tai mangso amikhan ke khabole dibo paribo?” ⁵³ Titia Jisu taikhan ke koise, “Moi tumikhan ke hosa kobo, tumikhan Manu laga Putro laga mangso aru Tai laga khun jodi nakhabo, tinehoile tumikhan logote jibon nathakibo. ⁵⁴ Jun Moi laga mangso khabo, aru Moi laga khun khabo, anonto jibon tai laga ase, aru Moi hekh dinte taike uthai lobo. ⁵⁵ Kelemanee Moi laga mangso he asol kha luwa ase, aru Moi laga khun bhi asol laga khun ase. ⁵⁶ Jun Moi laga mangso khabo aru Moi laga khun khabo tai Moi logote ase, aru Moi tai logote ase. ⁵⁷ Jivit Baba he Moike pathaise, aru Moi Baba karone jivit ase, tineka jun Moike khabo, tai bhi Moi karone jivit hobo. ⁵⁸ Etu to sorgo pora aha roti ase, tumikhan laga baba khan manna khaise aru mori jaise, jun bhi etu roti khabo, tai anonto tak jinda thakibo.” ⁵⁹ Tai etu kotha khan sob Capernaum laga mondoli te thaka somoite manu

† 6:45 6.45 Isa. 54:13.

khan ke sikhai thakise.

Anonto Jibon Laga Kotha

⁶⁰ Karone Tai chela khan jitia etu hunise taikhan koise, “Etu kotha to bisi digdar kotha ase, eitu khan to kun mani bole paribo?” ⁶¹ Jitia Tai chela khan etu kotha patise, Jisu jani kene taikhan ke koise, “Etu kotha karone tumikhan thogar lagise?” ⁶² Aru jodi Manu laga Putro age te thaka jagate wapas uporte juwa tumikhan dikhile kineka hobo?” ⁶³ Jibon di thaka to Atma ase, gaw to eku labh nai, Moi tumikhan ke kowa khan to atma ase, aru jibon bhi ase. ⁶⁴ Kintu tumikhan majote kunba biswas nakora ase.” Kelemanee Jisu he shuru pora jani ase, kun biswas nakore aru kun Taike thogai dibole ase. ⁶⁵ Aru tai koise, “Etu karone, Moi tumikhan ke koise, jitia tak Baba pora bordan nadibo kun bhi Moi logote ahibo na paribo.”

⁶⁶ Etu kotha karone Tai chela khan bisi Taike chari kene wapas jai jaise. ⁶⁷ Titia Jisu pora baroh jonke koise, “Tumikhan bhi wapas jabole mon kora nai na?” ⁶⁸ Kintu Simon Peter Taike jowab dise, “Probhu amikhan kun logote jabo? Anondo jibon laga vachan to Apuni logote ase, ⁶⁹ aru amikhan biswas kori ase, aru jani ase, Apuni he Isor laga Pobitro Jon ase.” ⁷⁰ Jisu taikhan ke jowab dise, “Moi he tumikhan baroh jonke basi loise nohoi, aru tumikhan majote ekjon saitan ase?” ⁷¹ Tai Simon laga chokra Iscariot Judas laga kotha koi asele, kelemanee tai he Taike thogai dibole jon ase, baroh jon majote ekjon tai asele.

7

Tombu Laga Purbb Te Jisu Juwa

¹ Eitu khan huwa pichete, Jisu Galilee te berai thakise, kelemane Yehudi khan Taike morai dibole thaka karone Tai Judea phale berabo mon kora nai. ² Yehudi khan laga Tombu laga Purbb din bhi usor ahi ponchise*. ³ Karone Tai bhai khan Taike koise, "Etu jaga chari kene Judea te jai jabi, Apuni ki kaam kori ase etu Apuni laga chela khan bhi dikhi bole dibi. ⁴ Kelemane Jun bhi tai nijor naam ke untcha koribo mon kore, tai lukai kene nakore. Jodi Apuni etu kaam korise koile, Apuni nijorke dikhai dibi duniya ke." ⁵ Kelemane Jisu laga nijor bhai khan bhi Taike biswas kora nai. ⁶ Titia Jisu taikhan ke koise, "Moi jabole laga thik somoi huwa nai, kintu tumikhan karone hodai somoi taiyar ase. ⁷ Prithibi tumikhan ke ghin no koribo, kintu Moike ghin kore kelemane Moi taikhan laga biya kaam ke gawahi diye. ⁸ Tumikhan purbb te jabi; Moi to etiya etu purbb te najabo, kelemane Moi laga somoi pura huwa nai." ⁹ Tai taikhan ke etu sob koi dise, aru Tai Galilee te thaki jaise.

¹⁰ Kintu Tai bhai khan juwa pichete Tai bhi khula-khula nohoi, kintu lukai kene purbb te jaise. ¹¹ Titia, Yehudi cholawta khan Taike purbb te bisarise aru koise, "Tai kot te ase?" ¹² Aru manu khan majote Tai nimite kotha namila bisi ulaise. Kunba koi, "Tai bhal manu ase." Kintu dusra khan koise, "Nohoi, kintu Tai manu khan ke ulta loijai." ¹³ Hoilebi Yehudi cholawta khan

* **7:2** 7.2 Lev. 23.33-36,39-43; Deu. 16.13-15.

ke bhoi pora kun bhi Tai laga kotha khuli kene kowa nai.

¹⁴ Aru jitia purbb laga adha somoi jaise to Jisu mondoli te ahikena sikhable shuru hoise.

¹⁵ Aru Yehudi cholawta khan asurit hoise, koise, “Kineka etu manu Shastro jane, pora likha nathaki kene bhi?” ¹⁶ Jisu taikhan ke jowab di koise, “Moi sikhai di thaka kotha khan to Moi pora nohoi, kintu Moike pathai diya pora ase.

¹⁷ Jodi kunba Isor laga itcha te jabo mon korile, etu kotha to Isor pora ahise na Moi nijor khushi pora ase, tai nijor janibo. ¹⁸ Kun nijor khushi

pora kobo etu tai nijorke prosansa kori ase, kintu jun taike pathai diya ke prosansa kore, etu hosa ase aru tai monte adharmikta nathake. ¹⁹ Moses tumikhan ke niyom dise nohoi? Kintu tumikhan kun bhi niyom ke mana nai. Kile tumikhan Moike morai dibole bisari thake?”

²⁰ Bhir khan jowab di koise, “Tumi logote bhoot ase. Kun apnike morai dibole bisari ase?” ²¹ Jisu taikhan ke koise, “Moi ekta kaam kori dise, aru tumikhan sob asurit korise.

²² Moses tumikhan ke sunnot laga hukum dise, etu to, Moses pora nohoi kintu baba laga khandan khan pora ahise aru tumikhan Bisram dinte sunnot kori thake. ²³ Jodi ekjon manu Bisram dinte sunnot kori kene Moses

laga niyom nabhangai, to kele tumikhan Moike ghusa kore kelemane Moi Bisram dinte manu ke bhal kora nimate? ²⁴ Chehera saikene bisar na koribi, kintu dharmikta pora bisar koribi.”

Etu He Khrista Ase Naki?

²⁵ Titia Jerusalem pora aha kunba koise, “Taikhan pora morai dibole bisari thaka to etu

manu nohoi? ²⁶ Kintu sabi, Tai to khula-khula kotha koi ase aru kunbi Taike eku nokoi, Tai he Khrista ase koi kene Yehudi cholawta khan bhi jani loise? ²⁷ Etu manu kot pora ase, amikhan etu jani ase. Kintu jitia Khrista ahibo, Tai kot pora ase etu kun bhi najanibo.” ²⁸ Titia Jisu mondoli bhitor te jor pora hikai se aru koise, “Tumikhan Moike jane, Moi kot pora ahise. Hoilebi Moi nijor khushi pora aha nohoi kintu Jun he Moike pathaise Tai hosa ase, Junke tumikhan najane. ²⁹ Moi Taike jane, kelemane Moi Tai pora ahise, aru Tai he Moike pathaise.” ³⁰ Karone, taikhan Taike dhori bole kosis korise, kintu kun bhi Tai uporte hath diya nai, kelemane Tai somoi napuncha karone. ³¹ Aru bisi manu Taike biswas kori loise, aru taikhan koise, “Jitia Khrista ahibo, Tai etu manu pora kori diya pora bhi bisi asurit kaam nakoribo naki?”

Cholawta Khan Pora Jisu Ke Dhori bole Pathaise

³² Manu khan Jisu laga kotha koi thaka etu Pharisee khan jani kene, mukhyo purohit khan aru Pharisee khan Taike dhori bole daruga khan ke pathai dise. ³³ Titia Jisu taikhan ke koise, “Moi olop somoi karone tumikhan logote ase, pichete jun Moike pathaise Tai logote jai jabo. ³⁴ Tumikhan Moike bisaribo, aru napabo, aru kot te Moi jabo ta te tumikhan ahibo na paribo.” ³⁵ Titia Yehudi cholawta khan kotha korise aru taikhan majote hudise, “Tai kot te jabole ase, aru ki karone amikhan Taike napabo? Tai Yunani khan ephale-uphale hoi thaka khan ke sikhabole jai jabole ase? ³⁶ Tai kowa etu ki kotha ase,

‘Tumikhan Moike bisaribo, kintu Moike napabo, aru kot te Moi jabo ta te tumikhan ahibo na paribo?’”

Jibon Pani Laga Nodi

³⁷ Aru purbb laga ses dinte, juntu dangor din ase, Jisu uthi kene jor pora koise, “Jodi kunba pyasa ase, tai Moi logote ahi kene khabi. ³⁸ Jun Moike biswas koribo, tinehoile Shastro te kowa nisena, nodi jinda laga pani tai laga pet pora bohi ahibo.” ³⁹ Kintu Tai Atma laga kotha koi thakise, juntu biswas kora khan pabole thakise, aru Tai nijor mohima te juwa nai kelemane Pobitro Atma etiya tak Taike diya nai.

Manu Khan Majot Te Bhag Hoi Juwa

⁴⁰ Titia bhir pora kunba etu huni kene, “Asol bhabobadi etu he ase” koise. ⁴¹ Aru dusra koise, “Etu he Khrista ase.” Kintu kunba koise, “Khrista to Galilee pora ahibo naki?” ⁴² Khrista to David laga khandan pora aru Bethlehem bosti kot te David thakisele, ta te pora ahibo eneka Shastro te kowa nohoi?†” ⁴³ Titia Tai karone manu khan dui bhag hoi jaise. ⁴⁴ Aru kunba Taike dhori bole hoise, kintu kunbi Tai uporte hath diya nai. ⁴⁵ Titia daruga khan wapas mukhyo purohit khan aru Pharisee khan logote ahise, aru taikhan pora koise, “Kile tumikhan Taike loi aha nai?” ⁴⁶ Daruga khan jowab dise, “Kunbi Tai nisena kotha nakoi.” ⁴⁷ Titia Pharisee khan taikhan ke jowab dise, “Kile, tumikhan bhi thogai te giri ase? ⁴⁸ Kunba cholawta khan aru Pharisee khan Taike biswas kori luwa nohoi na? ⁴⁹ Kintu

† 7:42 7.42 Mic.5:2.

niyom najana etu bhir manu khan to shrapit hoise.”⁵⁰ Nicodemus jun he rati te Jisu logote ahise, tai pora taikhan ke koise,⁵¹ “Amikhan laga niyom hisab te manu laga kotha nahuna age te golti lagabo pare naki?”⁵² Taikhan taike jowab dise, “Tumi bhi Galilee manu ase? Sabi aru bisaribi, kelemane Galilee pora kun bhabobadi bhi naulabo lage.”

⁵³ Aru sob manu nijor-nijor ghor te jai jaise.

8

Ekjon Mahila Ke Bebichar Kaam Te Dhora

¹ Aru Jisu Oliv pahar te jai jaise. ² Ekdrom phojurte Tai aru mondoli te ahise, aru sob manu khan ahise; Tai bohi kene taikhan ke sikhai thakise. ³ Titia niyom likha khan aru Pharisee khan pora ekjon mahila ke loi anise junke bebichari kaam te dhorise, aru taike taikhan majot te khara kori dise. ⁴ Titia taikhan Jisu ke hudise, “Shika manu, etu mahila ke bebichari kaam te dhorise. ⁵ Aru niyom te pathor pora eneka khan ke mari dibi koi kene Moses he hukum di rakhise; kintu Apuni ki kobo?” ⁶ Taikhan Jisu ke porikha lobole he Taike eneka hudise, kintu eku bhi nahuna nisena Tai niche jhuki kene anguli pora matite kiba likhi thakise. ⁷ Kintu taikhan hudi thakise, titia Tai sidha khara hoi kene koise, “Tumi laga majote kun paap kora nai, tai he sob pora poila pathor taike maribi.” ⁸ Tai arubi niche jhuki kene anguli pora matite likhi thakise. ⁹ Jitia taikhan etu hunise, taikhan majot sobse bura khan pora shuru kori kene ekjon pichete ekjon kori kene jai jaise. Aru ta te Jisu ekla thaki jaise,

aru utu mahila jun majot te khara thakise. ¹⁰ Aru Jisu sidha khara hoi kene taike koise, “Mahila, kot te ase tumike golti diya khan? Kunbi tumike golti diya nai?” ¹¹ Tai koise, “Kunbi nai, Probhu.” Jisu koise, “Moi bhi tumike golti nadibo. Jabi aru paap na koribi.”

Moi Duniya Laga Puhor Ase

¹² Titia Jisu taikhan ke koise, “Moi he duniya laga puhor ase; jun Ami laga picha koribo, tai andhera te najabo, kintu jibon laga puhor pabo.” ¹³ Pharisee khan Taike koise, “Apuni nijorke sakhi di ase; Apuni laga sakhi hosa nohoi.” ¹⁴ Jisu taikhan ke jowab di koise, “Jodi Moi nijor karone sakhi dile bhi, Moi laga sakhi hosa ase. Kelemane Moi kot pora ahise aru kot te jabole ase etu Moi jane, kintu tumikhan to Moi kot pora ahise aru kot te jabole ase najane. ¹⁵ Tumikhan to mangso hisab bisar kore; Moi kunke bhi bisar no kore. ¹⁶ Jodi Moi bisar kore, Ami bisar kora hosa ase kelemane Moi ekla nohoi, kintu Moi Baba logote ase, jun Moike pathaise. ¹⁷ Aru tumikhan niyom te bhi likha ase duijon laga sakhi to hosa ase koi kene. ¹⁸ Moi nijorke sakhi di ase, aru Baba jun Moike pathaise Tai bhi Amike sakhi di ase.” ¹⁹ Titia taikhan Taike koise, “Tumi laga Baba kot te ase?” Jisu koise, “Tumikhan Moike bhi aru Moi laga Baba ke bhi najane; jodi tumikhan Amike janile, Ami laga Baba ke bhi janibole asele.” ²⁰ Tai etu kotha mondoli ghor te bhandar jaga pora koi thakise, aru kun bhi Taike dhora nai kelemane Tai somoi puncha nai.

21 Aru Tai taikhan ke koise, “Moi to jai jabo, aru tumikhan Moike bisaribo aru tumikhan nijor paap pora mori jabo. Moi kote jabo, ta te tumikhan ahibo na paribo.” 22 Karone Yehudi cholawta khan koise, “Tai nijorke namorabo na? Etu karone Tai koi ase, ‘Kot Moi jabo tumikhan ta te ahibo na paribo?’” 23 Karone Jisu taikhan ke koise, “Tumikhan to niche pora ase; Moi to upor pora ase. Tumikhan to etu prithibi laga ase; Moi etu prithibi laga nohoi. 24 Etu karone, Moi koise tumikhan nijor paap pora mori jabo. Keleman MOI ASE etu koi kene tumikhan biswas nokorile, tumikhan nijor paap pora mori jabo.” 25 Titia taikhan Taike koise, “Apuni kun ase?” Jisu taikhan ke koise, “Ki Moi tumikhan ke shuru pora koise etu ase.” 26 Moi bisi kotha kobole aru bisar kori bole ase tumikhan karone. Kintu Moike pathai diya to hosa ase; aru Tai pora Ami ki hunise, etu he Moi prithibi ke koi thake.” 27 Taikhan bujhi bo para nai Tai Baba laga kotha taikhan ke koise koi kene. 28 Titia Jisu taikhan ke koise, “Jitia tumikhan pora Manu laga Putro ke upor latkai dibo, titia tumikhan jani lobo MOI ASE, aru Moi nijor eku nakore, kintu jineka Baba he Moike sikhai, etu he Moi koi thake. 29 Tai Moike pathaise aru Tai Moi logote thake, Tai Moike ekla nachare, keleman MOI ASE etu koi itcha he kori thake.” 30 Jitia Jisu etu kotha koi dise, bisi manu Taike biswas kori loise.

Hosa He Tumikhan Ke Ajad Kori Dibo

31 Titia Jisu pora Taike biswas kori luwa Yehudi khan ke koise, “Tumikhan Ami laga kotha mani thakile tumikhan Ami laga hosa chela hoise;

³² aru tumikhan hosa ke jani lobo, aru hosa he tumikhan ke ajad kori dibo.” ³³ Taikhan Taike koise, “Amikhan Abraham laga khandan ase, kitia bhi kun laga nokor thaka nai; kineka Apuni koise, “Tumikhan ke ajad kori dibo’?” ³⁴ Jisu jowab dise, “Moi tumikhan ke hosa kobo, jun bhi paap te thakise tai paap laga noukar ase. ³⁵ Aru noukar to hodai ghor te nathake, kintu Putro to hodai thake. ³⁶ Karone, jodi Putro pora tumikhan ke ajad kori dile, tumikhan hosa pora ajad hoise. ³⁷ Tumikhan Abraham laga khandan ase etu Moi jane, kintu tumikhan Moike morai dibole bisari ase, kelemane Ami laga kotha karone tumikhan monte jagah nai. ³⁸ Moi pora kowa kotha khan sob Moi laga Baba logote dikhise; karone tumikhan bhi tumikhan baba pora ki hunise, etu he koribi.”

Saitan Laga Bacha khan

³⁹ Taikhan Taike jowab dise aru koise, “Amikhan laga baba to Abraham ase.” Jisu taikhan ke koise, “Jodi tumikhan Abraham laga bacha khan hoile, tumikhan Abraham laga kaam khan koribi. ⁴⁰ Etiya tumikhan Moike morai dibole bisari ase, ekjon manu kun tumikhan ke hosa koi dise juntu kotha khan Moike Isor pora hunai se. Abraham tineka kora nai. ⁴¹ Tumikhan to tumikhan baba khan laga kaam kori thake.” Taikhan pora Taike koise, “Amikhan bebichar kaam pora jonon luwa nohoi; amikhan Baba ekjon he ase; Isor.” ⁴² Jisu taikhan ke koise, “Jodi Isor tumikhan laga Baba hoile, tumikhan Moike morom koribo, kelemane Moi Isor pora

ahise, Moi nijor pora aha nohoi, kintu Tai Moike pathaise. ⁴³ Kile tumikhan Ami laga kotha bujhi bo napare? Tumikhan Ami laga kotha nahuna nimite ase. ⁴⁴ Tumikhan to tumikhan baba, bhoot laga ase, aru tumikhan tai itcha he kori bole bhal pai. Tai shuru pora khun kora ase aru tai hosa te khara nathaka karone tai logote hosa nai. Kitia tai misa koi, tai nijor mon pora koi thake, kelemane tai misa ase aru misa khan laga baba ase. ⁴⁵ Kintu, Moi hosa koi, tumi Moike biswas nakore. ⁴⁶ Kun Moike paap laga galti dibo pare? Jodi Moi hosa koi, to tumikhan Moike kele biswas nakore? ⁴⁷ Jun Isor pora ahise tai Isor kotha khan huni; kintu etu nimite tumikhan to taikhan laga kotha nahune, kelemane tumikhan Isor laga nohoi.”

Abraham Age Te Moi Ase

⁴⁸ Titia Yehudi khan Taike jowab di koise, “Amikhan hosa kowa nohoi Apuni Samaria manu ase aru Apuni logote ekjon bhoot ase?”

⁴⁹ Jisu koise, “Moi logote bhoot nai, kintu Moi Ami laga Baba ke sonman kore, aru tumikhan Moike bodnam kori ase. ⁵⁰ Kintu Moi nijor mohima nabisare; etu bisari thaka aru bisar kori thaka ekjon ase. ⁵¹ Hosa pora Moi tumikhan ke kobo, jodi kunba Ami laga kotha hune, tai kitia bhi mrityu nadikhibo.” ⁵² Titia Yehudi khan Taike koise, “Etiya amikhan jani loise, Tumi logote bhoot ase. Abraham aru bhabobadi khan bhi mori jaise; aru Apuni koise, ‘Jodi jun Ami laga kotha ke rakhi lobo, tai mrityu nadikhibo.’

⁵³ Apuni amikhan laga Baba Abraham kun mori

jaise, tai pora dangor ase naki? Bhabobadi khan bhi mori jaise. Apuni nijorke kun koi kene bhabi ase?" ⁵⁴ Jisu jowab dise, "Jodi Moi nijorke mohima korile, Ami laga mohima eku nai; kintu Moike mohima kora Ami laga Baba he ase- junke tumikhan Isor koi kene mate. ⁵⁵ Tumikhan Taike najane, kintu Moi Taike jane. Aru jodi Moi koi, 'Moi Taike najane', tumi nisena Moi bhi misa hoise, kintu Moi Taike jane aru Tai laga kotha mane. ⁵⁶ Tumikhan laga baba Abraham to Moi laga din dikhi bole asha te anondo kori ase, aru Tai dikhi paise aru khushi korise." ⁵⁷ Titia Yehudi khan Taike koise, "Apuni pachas saal bhi huwa nai, aru Apuni Abraham ke dikhise?" ⁵⁸ Jisu taikhan ke koise, "Hosa pora Moi tumikhan ke kobo, Abraham age pora, MOI ASE." ⁵⁹ Titia taikhan Taike mari dibole pathor uthaise; kintu Jisu Tai nijor lukai kene mondoli pora bahar ulai jaise.

9

Jonom Pora Andha Thaka ke Jisu Changai Kora

¹ Jitia Jisu jai thaka homoi te, jonom pora andha thaka ekjon ke Tai lok paise. ² Aru Tai chela khan Taike hudise, "Rabbi, kun paap korise, etu manu na tai baba ama khan karone jonom pora tai andha hoise?" ³ Jisu jowab dise, "Etu manu laga paap bhi nohoi, Tai baba-ama khan laga bhi nohoi, kintu tai karone Isor laga kaam dikhai dibole nimite. ⁴ Din thaka homoi te he kun Moike pathaise Tai laga kaam kori thakibo lage. Kelemanerati ahi ase. ⁵ Jitia Moi prithibi te ase, Moi he prithibi laga puhor ase."

⁶ Jitia Tai etu sob koi diya hoise, Tai matite thuki kene buka bonai loise, aru etu buka pora andha manu laga suku te lagai dise. ⁷ Aru Jisu taike koise, "Jabi, aru Siloam pukhuri te dhui lobi, " -juntu laga motlob ase "pathai diya." Karone tai jaise, aru dhui dise, aru dikhibo parikena wapas ghurai ahise. ⁸ Karone tai laga ghor usor manu khan kunkhan pora taike age te bhikh mangi thaka dikhi thakise, etiya taike dikhi kene koise, "Etu manu to rasta te bohi bhikh mangi thaka to nohoi?" ⁹ Kunba koise, "Etu tai ase." Dusra koise, "Nohoi, kintu tai nisena ase." Kintu tai koise, "Etu moi ase." ¹⁰ Titia taikhan taike hudise, "Kineka tumi laga suku khuli jaise?" ¹¹ Tai jowab dise, "Jun laga naam Jisu ase Tai mati buka bonai kene moi laga suku te lagai dise, aru moike koise, 'Siloam te jabi aru dhui dibi.' Aru moi jai kene dhui dise, aru moi dikhibo paise." ¹² Taikhan taike koise, "Tai kot te ase?" Tai jowab dise, "Moi najane."

¹³ Taikhan jun andha asele etu ke Pharisee khan logote loi anise. ¹⁴ Etu Bisram din asele jitia Jisu mati pora buka bonai kene tai laga suku bhal kori disele. ¹⁵ Titia Pharisee khan bhi taike aru hudise. Tai taikhan ke koise, "Tai ami laga suku te mati lagai dise aru etiya moi dikhise." ¹⁶ Karone kunba Pharisee khan koise, "Etu manu to Isor pora nohoi kelemane Tai Bisram din ke namane." Kintu kunba koise, "Kineka paapi manu eneka asurit kaam kori dikha bo paribo?" Aru taikhan bhag hoise. ¹⁷ Taikhan aru andha manu ke hudise, "Tumi Tai karone ki kobo, kun tumi laga suku khuli dise?" Andha manu

koise, “Tai to bhabobadi ase.” ¹⁸ Kintu Yehudi cholawta khan etu manu age te andha thakise aru etiya dikhibo pari ase koi kene biswas kora nai, jitia tak tai baba ama ke mati ani kene hudahudi kora nai. ¹⁹ Aru taikhan tai ama baba ke hudise, koise, “Etu tumikhan laga chokra jonom pora andha asele? Aru kineka kori etiya dikhi ase?” ²⁰ Tai ama baba taikhan ke jowab di koise, “Amikhan jane etu amikhan laga chokra ase aru jonom pora andha thakise. ²¹ Kintu amikhan etu najane tai kineka kori etiya dikhibo pari ase, aru kun tai laga suku khuli dise. Tai jawan hoise, taike hudi bhi. Tai nijor koi dibo.” ²² Tai ama baba khan Yehudi khan ke bhoi pora tineka koise, kelemane Yehudi khan age pora eneka koi kene ase jodi kunba Khrista naam kobo, etu manu laga naam mondoli pora ulai dibo. ²³ Etu karone, tai baba ama koise, “Tai jawan hoise, taike hudi bhi.” ²⁴ Aru taikhan dusra bar etu andha thaka manu ke mati ani kene taike koise, “Isor ke mohima koribi. Amikhan jane etu to paapi manu ase.” ²⁵ Tai jowab di koise, “Moi najane jodi Tai paapi manu ase. Ekta kotha moi jani ase; moi andha asele, aru etiya dikhi ase.” ²⁶ Titia taikhan taike koise, “Tai tumike ki korise? Kineka kori tai tumi laga suku khuli dise?” ²⁷ Tai taikhan ke koise, “Moi poila pora apuni khan ke koi dise, aru apuni khan huna nai! Kile apuni khan aru hunibo mon kori ase? Apnikhan bhi Tai chela hobole mon ase naki?” ²⁸ Titia taikhan taike gali dikene koise, “Tumi to Tai laga chela ase, kintu amikhan to Moses laga chela ase. ²⁹ Amikhan jane Isor pora Moses

logote prothom te kotha korise kintu etu manu to amikhan najane Tai kot pora ahise.”³⁰ Tai taikhan ke jowab di koise, “Etiya to asurit hoi ase, Tai kot pora ahise moi najane, hoilebi tai pora he ami laga suku bhal kori dise.”³¹ Amikhan jane Isor paapi manu ke nahune, kintu kun Isor ke thik mane aru Tai itcha kore, eitu khan ke Tai hune.³² Prithibi shuru pora etiya tak kun bhi jonon pora andha manu suku bhal kori diya hunai. ³³ Jodi etu manu Isor pora aha nohoile, Tai eku bhi koribo na paribo.”³⁴ Taikhan taike jowab di koise, “Tumi to hosa ke paap pora jonon hoise, aru tumi amikhan ke sikhable ase?” Titia aru taikhan taike khedai dise.

³⁵ Aru etu manu ke taikhan mondoli pora ulai dise koi kene Jisu hunise. Jitia Jisu taike lok paise, Tai hudise, “Tumi Manu laga Putro ke biswas kore?”³⁶ Tai jowab dikene koise, “Aru Tai kun ase, Probhu, moi Taike biswas koribo karone?”³⁷ Aru Jisu taike koise, “Tumi Taike dikhi loise, aru tumi logote kotha kori thaka etu he Tai ase.”³⁸ Titia tai koise, “Probhu, moi biswas korise” aru Taike aradhana korise.³⁹ Jisu koise, “Moi etu prithibi ke bisar kori bole ahise, jun manu nadikhe taikhan dikhi pabole, aru jun manu dikhe taikhan ke andha kori dibole.”⁴⁰ Kunba Pharisee jun khan Tai logote asele taikhan etu kotha huni kene taike koise, “Amikhan bhi andha ase naki?”⁴¹ Jisu taikhan ke koise, “Jodi tumikhan andha thakise koile, tumi laga paap nathakibole asele, kintu etiya tumikhan koi ase, ‘Amikhan dikhi ase,’ karone tumikhan laga paap thaki jabo.”

10

Moi Bhal Mer Roikhya Jon Ase

¹ “Hosa pora Moi tumikhan ke kobo, kun mer rakha dorja pora na ghusikena dusra rasta pora ghusi bo etu to chor aru dokait ase. ² Kintu jun dorja pora ghusi bo tai he mer laga roikhya ase. ³ Tai karone dorjate rukhi thaka manu pora dorja khuli dibo. Aru mer khan tai laga awaj hunibo, aru tai nijor mer khan laga naam mati kene bahar te loijai thake. ⁴ Aru jitia tai mer khan ke bahar kori loise, tai eitu khan laga age jai thake, aru mer khan piche ahi thake, kelemane eitu khan tai laga awaj jane. ⁵ Aru taikhan najana manu laga piche najabo, kintu polai jabo, kelemane taikhan eitu khan laga awaj nachine.” ⁶ Jisu pora etu dristanto taikhan ke koise, kintu taikhan Tai ki koise etu laga motlob bujhi bo para nai.

⁷ Titia Jisu taikhan ke aru koise, “Hosa pora Moi tumikhan ke kobo, Moi he mer khan laga dorja ase. ⁸ Moi pora age te jiman ahise, sob chor aru dokait ase, kintu mer khan pora taikhan ke hunai. ⁹ Moi he dorja ase, jodi kunba Moi dwara ghusi bo, tai poritran pabo, aru bhitor bahar aha juwa koribo, aru dana pabo. ¹⁰ Chor khali chor kori bole nohoi kintu morai dibole aru biya kori bole ahe*. Moi aha to taikhan jibon pabole aru etu ke bhi bisi bhorta thaka jibon dibo karone ahise. ¹¹ Moi bhal mer roikhya ase. Bhal mer roikhya to mer khan karone nijor jibon di diye. ¹² Hoile bhi ekjon hajira kora manu

* **10:10** 10.10 Yate chor to Saitan ke mati ase.

to roikhya nohoi, aru mer khan laga malik bhi nohoi. Tai kitia rong kutta aha dikhe, mer khan ke chari kene polai jai, aru rang-kutta he mer khan ke dhori loijai, aru mer khan ke ephale-uphale polabo diye. ¹³ Kelemanee tai hajira kora manu ase etu karone polai jai, tai mer khan karone chinta nathaki. ¹⁴ Moi bhal mer roikhya ase, aru Moi nijor mer khan ke jane, aru Moi laga mer khan bhi Moike jane. ¹⁵ Jineka Baba Moike jane, Moi bhi Baba ke jane, aru Moi mer khan karone Moi laga nijor jibon di ase. ¹⁶ Aru Ami laga dusra mer khan bhi ase jun khan etu mer ghor te nathake. Taikhan ke bhi Moi anibo lage, aru taikhan Moi laga awaj hunibo, aru titia sob mer khan ekta hoi jabo aru mer roikhya bhi ekjon he thakibo. ¹⁷ Moi laga Baba Moike etu nimate morom kore: kelemanee Moi nijor laga jibon dise aru bhi wapas loi lobo karone. ¹⁸ Kun bhi etu Moi pora chingibo napare, kintu Moi he nijorke di ase. Ami laga jibon dibole aru loi lobole bhi Moi adhikar ase, etu hukum Moi laga Baba pora paise.”

¹⁹ Etu kotha karone Yehudi khan laga majote aru kotha namila hoise, aru apaste bhag hoise. ²⁰ Aru bisi manu koi, “Tai logote bhoot ase, aru tai pagala ase. Kile apuni khan tai laga kotha huni ase?” ²¹ Aru dusra koise, “Etu kotha eneka manu laga nohoi jun logote bhoot thakise. Bhoot pora andha laga suku khuli dibo pare naki?”

Moi Aru Baba To Ekjon He Ase

²² Aru etu somoite Jerusalem sheher te Samarpan laga Purbb asele. Aru etu thanda

din thakise, ²³ aru Jisu to Solomon laga veranda kowa jagate aha juwa kori thakise. ²⁴ Titia kunba Yehudi khan Taike gheri loise, aru koise, "Apuni kiman deri amikhan ke chinta te rakhible ase? Jodi Apuni Khrista ase koile amikhan ke koi dibi." ²⁵ Jisu taikhan ke jowab dise, "Moi tumikhan ke koi dise, aru tumikhan biswas kora nai. Ki kaam Moi laga Baba naam te kori ase, etu he Moi laga sakhi di ase. ²⁶ Kintu tumikhan biswas nakore kelemane tumikhan Ami laga mer nohoi. ²⁷ Ami laga mer khan Ami laga awaj hune; Moi taikhan ke jane, aru taikhan Ami laga piche ahe. ²⁸ Aru Moi taikhan ke anondo jibon diye, aru taikhan kitia bhi namoribo, aru kun bhi taikhan ke Ami laga hath pora chingi loijabo na paribo. ²⁹ Ami laga Baba, Jun he etu sob Moike dise, Tai sob pora dangor ase, aru kun bhi Baba laga hath pora taikhan ke chingibo na paribo. ³⁰ Moi aru Moi laga Baba ekjon ase, ³¹ Titia Yehudi khan Taike mari bole pathor uthaise. ³² Jisu taikhan ke jowab dise, "Moi pora tumikhan ke Moi laga Baba laga bhal kaam bisi dikhai dise. Kuntu kaam karone tumikhan Moike pathor mari bole hoise?" ³³ Yehudi khan Taike jowab dise, "Bhal kaam karone amikhan Apuni ke pathor mari bole nohoi, kintu Isor ke ninda kora, aru tumi manu hoi kene, nije ke Isor bonai thaka karone." ³⁴ Jisu taikhan ke jowab dise, "Etu tumikhan niyom te likha nai, 'Moi koise, "Tumikhan bhi Isor ase' "? ³⁵ Jodi Tai tumikhan ke Isor koile, jun khan logote Isor laga kotha ponchise, - aru Shastro laga kotha khan to bhang jable nohoi,- ³⁶ tumikhan Taike koi ase

jun Baba he alag bonai kene duniya te pathai dise, ‘Tumi ninda kori ase,’ kelemane Moi koise, ‘Moi Isor laga Putro ase?’ ³⁷ Jodi Moi Ami Baba laga kaam nakore, to Moike biswas na koribi. ³⁸ Kintu jodi Moi kaam kori thakile bhi, tumikhan Moike biswas nokorile, kaam to saikene biswas kori lobi, titia tumikhan jani lobo aru biswas kori lobo Baba pora Moi bhitor te ase aru Moi Tai bhitor te ase.” ³⁹ Karone taikhan aru bhi Taike dhori bole korise, kintu Tai taikhan hath pora ulai jaise.

⁴⁰ Aru Tai Jordan nodi paar jaga, kot te John prothom baptizma di thakisele, ta te jai kene thaki jaise. ⁴¹ Titia bisi manu Jisu logote ahi koise, “John to eku chihna dikha diya nai, kintu John pora etu manu laga ki kotha koise, etu sob hosa ase.” ⁴² Aru ta te bisi manu Taike biswas kori loise.

11

Lazarus Mora Laga

¹ Ekjon bemar thaka manu Lazarus koi kene thakise. Tai, aru bhoini Mary aru Martha khan laga bosti naam to Bethany thakise. ² Aru etu Mary he asele jun pora age te itra tel loi kene Probhu ke abhishek kori kene tai laga chuli pora Jisu laga theng mussi dise, aru bemar Lazarus to tai laga bhai asele. ³ Karone tai bhoini khan pora manu pathai kene koise, “Probhu, kunke Apuni morom kore, tai bemar ase.” ⁴ Jitia Jisu etu kotha hunise, Tai koise, “Etu bemar to mori jabole laga bemar nohoi, kintu Isor ke mohima aru Manu laga Putro ke mohima hobo karone ase.” ⁵ Jisu to

Martha aru tai bhoini aru Lazarus ke bhi morom kori thakisele. ⁶ Aru jitia Tai hunise Lazarus bemar ase koi kene, Jisu kot te thakise ta te dui din aru rukhi jaise. ⁷ Titia etu pichete, Tai laga chela khan ke koise, “Ahibi, amikhan Judea te aru jabo.” ⁸ Tai chela khan Taike koise, “Rabbi, aji kali Yehudi khan Apuni ke pathor mari bole bisari ase, aru Apuni ta te jabole ase?” ⁹ Jisu jowab dise, “Kile dinte baroh ghanta nathake naki? Jodi kunba dinte beraile tai thogar nakhai, kelemane tai duniya laga ujala ke pai thaka karone. ¹⁰ Kintu jodi kunba rati te beraile, puhor tai logote nathaka karone thogar khai.” ¹¹ Tai eitu khan kotha koi diya pichete, eneka koise, “Amikhan laga sathi Lazarus ghumai ase, kintu Moi taike uthai dibole jabo.” ¹² Titia Tai chela khan koise, “Probhu, jodi tai ghumi ase koile, tai basi jabo.” ¹³ Jisu tai mori bole laga kotha he koise, kintu taikhan to aram pora ghumai thaka kotha he bhabise. ¹⁴ Titia Jisu taikhan ke sidha koi dise, “Lazarus mori jaise. ¹⁵ Moi khushi ase, tumikhan karone, Moi ta te thaka nai, etu karone tumikhan biswas kori lobo. Kintu amikhan tai logote jabo.” ¹⁶ Titia Thomas, junke Didymus bhi koi, tai sathi chela khan ke koise, “Ahibi amikhan bhi jabo Jisu logote moribo karone.”

Moi Punoruthan Aru Jibon Ase

¹⁷ Karone jitia Jisu ahise, Tai janise Lazarus ke kobor te rakhi diya char din hoise. ¹⁸ Aru Bethany to Jerusalem usor ase, dui kos he dur nisena te ase. ¹⁹ Aru Yehudi khan bisi Martha aru Mary logote ahise, tai bhai karone mon aram kori dibole. ²⁰ Jitia Martha hunise Jisu

ahi ase, tai lok pabole jaise, kintu Mary to ghor te bohi thakise. ²¹ Martha pora Jisu ke koise, “Probhu, jodi Apuni yate thakile, moi laga bhai namoribole asele. ²² Kintu etiya bhi, moi jane Apuni Isor ke ki mangile Isor pora etu Apuni ke dibo.” ²³ Jisu taike koise, “Tumi laga bhai aru jinda hoi jabo.” ²⁴ Martha Taike koise, “Moi jane tai aru jee uthibo hekh dinte.” ²⁵ Jisu taike koise, “Moi, he punoruthan aru jibon ase; jun Moike biswas koribo, jodi tai morile bhi, jinda hobo; ²⁶ Aru jun bhi jinda thake aru Moike biswas kore tai kitia bhi namoribo. Tumi etu kotha biswas kore?” ²⁷ Tai Jisu ke koise, “Hoi, Probhu, Moi biswas ase Apuni Khrista ase, Isor laga Putro, jun duniya te ahibole thaka jon ase.”

Jisu Kandise

²⁸ Aru tai etu koi diya pichete, tai jai jaise aru lukai kene tai bhoini ke koise, “Shika manu yate ahi ase, aru apuni ke mati ase.” ²⁹ Tai etu huna logote uthi kene Tai logote jaise. ³⁰ Titia tak Jisu to bosti te puncha nai, kintu kot te Martha Taike lok korise ta te he thakise. ³¹ Titia jun Yehudi khan tai laga ghor te thakise aru tai laga mon aram koridi thakisele, taikhan Mary to joldi uthi kene juwa dikhise, aru tai kobor te jai kene kandibole jai ase bhabise aru tai laga piche korise. ³² Jitia Mary to Jisu thaka jagate ponchise, tai Jisu ke dikhi kene Tai theng te giri kene koise, “Probhu, jodi Apuni yate thakile, ami laga bhai namoribole asele.” ³³ Kitia Jisu tai kanda dikhise, aru Yehudi khan tai logote aha khan kanda dikhise, Tai Atma te bisi bhabise aru mon chinta

hoise; ³⁴ aru Tai koise, “Tumikhan taike kot te rakhise?” Taikhan Taike koise, “Probhu, ahi kene sabi.” ³⁵ Jisu kandise. ³⁶ Titia Yehudi khan koise, “Sabi kiman morom kore ase Lazarus ke!” ³⁷ Kintu taikhan kunba koise, “Tai age te andha manu laga suku bhal kori diya Tai etu manu na hoi, etu manu ke namoribo dibo para nai?”

Jisu Pora Lazarus Ke Mora Pora Jinda Uthai Diya

³⁸ Aru Jisu bisi mon dukh hoi kobor te ahise, etu ekta gufa asele, aru ekta pathor pora dhaki rakhi thakise. ³⁹ Jisu koise, “Pathor ke hatai dibi. Martha, mori juwa laga bhoini, Jisu ke koise, “Probhu, etiya to pucha gundai thakibo, char din hoise.” ⁴⁰ Jisu taike koise, “Kile, Moi tumike kowa nohoi, jodi tumi biswas korile, tumi Isor laga mohima dikhibo?” ⁴¹ Titia taikhan pathor ke hatai dise, Jisu Tai suku upor uthai koise, “Baba, Moi Apuni ke dhanyavad di ase, Apuni Ami laga prathana huni luwa karone. ⁴² Moi jane, Apuni Moike hodai hune kintu Ami usorte thaka khan karone Apuni he Moike pathaise, etu jani kene biswas koribo karone Moi etu koi dise.” ⁴³ Titia Tai etu koi diya pichete, Tai jor pora hala kori koise, “Lazarus, ulai ahibi!” ⁴⁴ Titia mora manu ulai ahise; aru bhori aru hath kapra pora bandi kene aru Tai mukh ekta gamcha pora dhaki asele, Jisu taikhan ke koise, “Khuli dibi aru taike jabo dibi.”

Jisu ke Morai Dibole Buddhi

⁴⁵ Titia bisi Yehudi khan jun Mary logote ahise aru Jisu kaam kori diya dikhi kene biswas kori

loise. ⁴⁶ Kintu taikhan kunba Pharisee khan logote jai kene Jisu kaam kori diya sob koi dise.

⁴⁷ Karone mukhyo purohit khan aru Pharisee khan sabha te joma hoi kotha korise, “Amikhan ki korile bhal hobo? Etu manu bisi asurit kori ase. ⁴⁸ Jodi amikhan Taike eneka kori thakibo dile, sob manu Taike biswas kori jabo, aru Rome laga cholawta khan ahikena amikhan laga jagah aru jati duita ke bhi amikhan laga hath pora loi lobo.” ⁴⁹ Aru taikhan majote sabha laga ekjon manu Caiaphas asele, jun etu saal pora moha purohit laga kaam shuru korisele, tai pora taikhan ke koise, “Tumikhan eku najane. ⁵⁰ Sob desh nost huwa pora to ekjon mori juwa he bhal hobo, etu bhi tumikhan na bhabe.” ⁵¹ Etu tai nijor pora kowa nohoi. Kintu etu saal pora tai moha purohit kaam korise, etu karone tai bhabobani korise Jisu he etu jati manu karone moribo; ⁵² Aru khali etu jati karone he nohoi, kintu Isor laga khandan khan, ephale-uphale hoi thaka khan sobke bisari ekta kori bole ase. ⁵³ Titia taikhan etu din pora Taike morai dibole bisari thakise.

⁵⁴ Karone, Jisu to aru Yehudi khan majote khula nabera hoise, kintu ta te pora jongol usorte Ephraim koi kene thaka ekta town te Tai chela ke loi ta te thaki jaise. ⁵⁵ Aru Yehudi laga Nistar usor asele, titia bosti pora bisi manu nijorke pobitro kori bole Nistar age te Jerusalem jaise. ⁵⁶ Titia taikhan ta te Jisu ke bisarise, aru mondoli te joma hoi kene koise, “Apnikhan ki bhabi ase? Tai etu purbb te nahibo?” ⁵⁷ Aru mukhyo purohit khan aru Pharisee khan pora hukum di rakhise, Tai

kot te ase etu janile khobor dibole, Taike dhori bole karone.

12

Bethany Te Mary Pora Jisu Ke Abhishek Kora

¹ Titia, Nistar laga choi din age te Jisu Bethany te ahise, utu jaga juntu te Lazarus thake, kunke Tai mora pora jinda korise. ² Taikhan Tai karone rati laga kha luwa bonai dise, aru Martha sewa korise, kintu Lazarus bhi ta te ekjon mez te Jisu logote bohi asele. ³ Titia Mary pora adha liter jiman bisi daam laga tel ani kene Jisu laga theng te lagai dise, aru tai nijor chuli pora Tai theng ke mussi dise, aru litra tel laga sugandh pora pura ghor bhorta hoise. ⁴ Kintu Tai laga chela ekjon, Judas Iscariot, jun Taike thogabole ase, koise, ⁵ “Kile etu tel tin sou dinari pora bikiri kori kene dukhiya khan ke diya nai?” ⁶ Tai etu kowa to dukhiya khan nimate chinta karone kowa nohoi, kintu tai chor asele. Taikhan laga poisa jola bhi tai logote ase, aru ta te ki halibo tai etu pora chor kori kene loi thakise. ⁷ Karone Jisu koise, “Tai ekla ke chari dibi. Ami laga moidam diya din karone rakhibo dibi. ⁸ Kelemanee dukhiya khan tumikhan laga logote hodai thakibo, kintu Moi tumikhan logote hodai nathakibo.”

Lazarus Ke Morai Dibole Buddhi

⁹ Titia bisi Yehudi manu khan janise Jisu ta te ase, aru taikhan ahise, Jisu ekla karone aha nohoi, kintu junke Tai mora pora jinda korise, Lazarus, ke bhi sabole ahise. ¹⁰ Kintu prodhan purohit khan Lazarus ke bhi morai

dibole bhabisele; ¹¹ kelemane Yehudi khan bisi manu tai karone jai jaise, aru Jisu ke biswas kori loise.

Jitikena Jerusalem Te Juwa

¹² Dusra din dangor bhir purbb te ahise. Jitia taikhan hunise Jisu Jerusalem te ahi ase, ¹³ Taikhan palm ghas laga daal ulai ani kene Taike lok kori bole ahise aru jor pora koise, “Hosanna*! Probhu laga naam loi kene aha Israel laga Raja, dhoinyo ase.” ¹⁴ Titia Jisu ekta gadha puwali paikene etu uporte bohi jaise; jineka likha ase, ¹⁵ “Bhoi nokoribi, Zion laga swali, sabi, tumi laga Raja ahi ase, gadha bacha uporte bohi kene†.” ¹⁶ Tai chela khan bujibo para nai shuru te; kintu jitia Jisu mohima hoise, taikhan bhabona ahise, etu Tai nimate likha asele, aru manu khan Tai uporte eneka kori diya bhabona ahise. ¹⁷ Titia bhir khan gawahi dise taikhan bhi Tai logote he thakise jitia Tai Lazarus ke kobor pora ulabi koi kene matise aru mora pora jinda kori dise. ¹⁸ Karone dangor bhir Taike lok kori bole ahise, kelemane taikhan hunise Tai etu chihna dikhaise. ¹⁹ Titia Pharisee khan apaste kotha korise, “Sabi, tumikhan eku bhi koribo na paribo; sabi, duniya Tai piche jai ase.”

Yunani Manu Kunba Pora Jisu ke Bisara

²⁰ Titia aradhana kori bole purbb te aha khan majote kunba Yunani khan bhi asele. ²¹ Karone taikhan Philip logote ahise, jun Galilee jagate

* **12:13** 12.13 Hosanna kuwa to modot nimate kanda laga ase aru etu laga motlob ase “Morom kori kene bachai lobi.” † **12:15** 12.15 Isa. 40:9, Zep. 3:1.

Bethsaida town laga manu ase, aru taikhe hudise, “Sahab, amikhan Jisu ke sabole mon korise.”
²² Philip ahikena Andrew ke koise; Andrew Philip logote jaise, aru taikhan Jisu ke koi dise.
²³ Kintu Jisu taikhan ke jowab dise aru koise, “Etu somoi Manu laga Putro ke mohima hobole ahise. ²⁴ Hosa Moi tumikhan ke kobo, jitia tak ekta gehu dana matite giri kene namore, etu eneka he thake; kintu jodi etu mori jai, titia bisi dana ulai thake. ²⁵ Jun nijor jibon morom kore tai harai dibo; kintu jun etu duniya te nijor jibon morom nokorile, tai anondo jibon karone bachibo. ²⁶ Jodi kun Moike sewa kore, taikhe Ami laga piche ahibole dibi; aru Moi kun jagate thakibo ta te Ami laga noukar bhi thakibo. Jodi kun Moike sewa koribo, Baba bhi taikhe sonman koribo.

Manu Laga Putro ke Uthai Dibo Lagibo

²⁷ Etiya Ami laga Atma bisi chinta ase aru Moi ki kobo? Baba, Moike etu somoi pora bachabi? Kintu etu somoi karone he Moi ahi ponchise. ²⁸ Baba, mohima hobi Apuni laga naam.” Titia sorgote ekta awaj ahi koise, “Moi etu age te mohima korise, aru bhi mohima kori dibo.” ²⁹ Titia ta te khara thaka khan huni koise bhijili marise. Dusra pora koise, “Sorgodoth Tai logote kotha kori ase.” ³⁰ Jisu koise, “Etu awaj Moi karone nohoi, kintu tumikhan nimate ase. ³¹ Etiya etu prithibi ke bisar kori ase; Etiya etu prithibi laga raja‡ ke hatai dibo. ³² Jitia Moike etu prithibi pora uthai loijabo, Moi logote sob manu

‡ **12:31** 12.31 Etu Saitan ke kuwa ase.

ke tani loijabo. ³³ Kintu Tai koise etu dikha bole kineka pora tai moribo. ³⁴ Titia bhir khan Taike koise, “Amikhan niyom te likha janise, Khrista hodai thakibo. Kineka Apuni koi ase, ‘Manu laga Putro ke upor loijabo? Kun etu Manu laga Putro ase?’ ” ³⁵ Aru Jisu Taikhan ke koise, “Olop somoi karone puhor tumikhan logote ase. Jitia tak tumikhan logote puhor ase titia tak berai thakibi, andhera tumikhan logote napuncha age te, aru jun andhera te berai thake, tai kot te jai najane.

Manu Khan Laga Abiswas

³⁶ Jitia tak tumikhan logote puhor ase, puhor ke biswas koribi titia tumikhan puhor laga bacha khan hobo.”

Jisu eitu khan koise aru taikhan pora luki jaise.

³⁷ Aru Tai Taikhan ke bisi asurit chihna dikhaise, hoilebi taikhan Taike biswas kora nai. ³⁸ Etu sob hoise Isaiah bhabobadi pora kowa pura hobole karone eitu khan sob hoise:

“Probhu, kun amikhan koi diya kotha biswas korise,

Aru Probhu laga hath kunke dikhai dise?”

³⁹ Karone Taikhan biswas koribo para nai, Isaiah bhi koise,

⁴⁰ “Tai he taikhan laga suku andha kori dise, aru

Tai he taikhan laga mon tan kori dise;

Nohoile taikhan suku pora sabo pare aru mon pora bujhi bo pare,

Aru taikhan ghuri bo,

Aru Moi taikhan ke bhal kori dibo.”

§ 12:40 12.40 Isa. 6:10; Mat. 13:13-15; Mark 4:12; Luke 8:10.

⁴¹ Isaiah etu kotha koise kelemane tai Jisu laga mohima dikhise aru Tai nimite koise. ⁴² Kintu eneka hoilebi, bisi Yehudi cholawta khan Jisu ke biswas kori loise; kintu Pharisee khan karone, taikhan grohon kora nai, taikhan mondoli pora ulai dibo bhoi pora khuli dikhai diya nai. ⁴³ Kelemane taikhan Isor prosansa pora to manu laga prosansa he bhal pai thakise.

Prithibi Bacha bole Jisu Ahise

⁴⁴ Titia Jisu jor pora koise, “Kun Moike biswas kore, Moike he biswas kora nohoi kintu Moike pathai diya ke biswas kore, ⁴⁵ aru jun Moike dikhise Moike pathai diya ke bhi dikhise. ⁴⁶ Moi prithibi te puhor hoi ahise, jun Moike biswas kore tai andhera te nathakibo. ⁴⁷ Jodi kunba Moi laga kotha huni kene namane, Moi taike bisar nakore; kelemane Moi prithibi ke bisar kori bole aha nohoi, kintu prithibi ke bacha bole he ahise. ⁴⁸ Jun Moike grohon nakore, aru Moi laga kotha ke grohon nakore, taike bisar kori bole ekjon ase, motlob ji kotha Moi koi dise etu he hekh dinte taike bisar koribo. ⁴⁹ Kelemane Moi nijor pora kotha kowa nohoi, kintu Baba jun he Moike pathaise, Tai he Moike hukum dise ki jonai dibo lage aru ki kobo lage. ⁵⁰ Moi jane Tai laga hukum anonto jibon ase, etu Moi thik pora jani ase- etu karone jineka Baba pora Moike kotha koi, eneka he Moike koidi thake.”

13

Jisu Pora Chela Khan Laga Theng Dhulai Diya

¹ Etiya Nistar purbb din age te, Jisu jani jaise Tai etu duniya chari kene Baba logote jabole somoi ahise. Kunkhan Tai logote duniya te thakise, eitu khan ke Tai morom kori ahise, aru tineka hekh tak morom korise. ² Aru jitia taikhan eke logot te rati laga kha-luwa kori thakise, titia Simon laga chokra Iscariot Judas laga monte bhoot ghusi se, Jisu ke thogai bole nimite. ³ Jisu jani thakise Baba he sob jinis khan Taike dise, aru Tai Isor pora ahise aru Isor logote wapas jabole ase. ⁴ Tai kha luwa somoite uti kene Tai nijor kapra ulai rakhi kene ekta gamcha loise aru Tai laga nijor komor bandi loise. ⁵ Titia Tai borton te pani hali kene chela khan laga theng dhui dise aru gamcha Tai komor te bandi thaka ke loise aru taikhan laga theng mussi dise. ⁶ Jitia Tai Simon Peter logote ponchise, Peter Taike koise, "Probhu, Apuni ami laga theng dhubo?" ⁷ Jisu taike jowab di koise, "Moi ki kori ase etu etiya tumi najane, kintu etu pichete tumi jani jabo." ⁸ Peter Taike koise, "Apuni ke ami laga theng dhubo nadibo," Jisu taike koise, "Jodi Moi tumike nadholaille, tumi Moi phale eku bhi hisa nai." ⁹ Simon Peter Taike koise, "Probhu, khali ami laga theng he nohoi, kintu hath aru matha bhi dhui dibi." ¹⁰ Jisu taike koise, "Jun gaw dhui loise tai to khali theng he dhuile hoise, dusra sob sapha ase, aru tumikhan sapha ase; kintu tumikhan sob nohoi." ¹¹ - Kelemanee Jisu jani thakise kun Taike dhori bole ase; etu karone Tai koise, "Tumikhan sob sapha nohoi."- ¹² Jitia Tai taikhan laga theng dhuwa hoise, Tai nijor kapra lagai loise aru bohi jaise, aru taikhan ke

koise, “Tumikhan bujhi se Moi tumikhan karone ki korise? ¹³ Tumikhan Moike ‘Shika manu,’ ‘Probhu,’ eneka koi aru tumikhan thik koi ase, kelemane Moi etu he ase. ¹⁴ Jodi Moi Shika manu aru Probhu hoi kene tumikhan laga theng dhuile, tumikhan bhi ekjon-ekjon laga theng dhubo lage. ¹⁵ Kelemane Moi tumikhan ke motlob dikhai dise, tumikhan bhi tineka kori thakibi. ¹⁶ Hosa pora Moi tumikhan ke kobo, ekjon nokor to tai malik pora dangor nohoi; aru khobor diya manu ekjon khobor pathai diya manu pora dangor nohoi. ¹⁷ Jodi tumikhan eitu khan jane, aru mani thakile tumikhan asishit hobo. ¹⁸ Moi tumikhan sob laga kotha kowa nohoi; Moi junke basi loise taikhan he jane- kintu Shastro he pura hobo karone eneka hoise: ‘Kun Ami logote bhaat khai ase, etu he Moike laat marise*.’ ¹⁹ Moi tumikhan ke etiya etu nohua age te koi diya to, etu kitia hobo, tumikhan biswas koribo MOI ASE†. ²⁰ “Hosa pora Moi tumikhan ke kobo, kun Moi patha diya ke grohon kore, tai Moike grohon kori ase, aru jun Moike grohon korise, tai Moike patha Jonke grohon kori loise.”

Tumikhan Ekjon Pora Moike Thogai Dibo

²¹ Jitia Jisu etu sob kowa hoise, Tai Atma te bisi dukh hoise. Tai gawahi dikene koise, “Hosa pora Moi tumikhan ke kobo tumikhan majote ekjon Moike thogai dibole ase.” ²² Chela khan ekjon-ekjon ke saise, asurit hoi kene etu kun hobo hudise. ²³ Kintu ekjon chela junke Jisu morom kore, tai Jisu laga usorte mez te matha

* **13:18** 13.18 Psa. 41:9. † **13:19** 13.19 John 14:29.

niche kori bohi thakise. ²⁴ Karone Simon Peter taike ishara kori kene koise, “Tai kun laga kotha koi ase amikhan ke koi dibi.” ²⁵ Titia tai Jisu laga chati usorte niche kori kene Jisu ke koise, “Probhu, etu kun ase?” ²⁶ Jisu koise, “Etu junke Moi roti bhi jai kene dibo etu he tai ase.” Aru Tai ekta roti uthaikene bhi jaise aru Simon laga chokra Iscariot Judas ke dise. ²⁷ Aru tai etu roti luwa pichete Saitan tai laga monte ghusi jaise, titia Jisu taike koise, “Tumi ki kori bole ase joldi koribi.” ²⁸ Kintu mez usorte boha khan kunbi Tai etu kotha kele koise etu bujibo para nai. ²⁹ Kunba bhabise, Judas hathte poisa laga jola thaka karone, Jisu taike koise, “Kiba kinibi amikhan lage purbb karone,” nohoile dukhiya khan ke kiba dibole. ³⁰ Jitia tai roti loise, tai joldi bahar te ulai jaise, aru etu somoi rati asele.

Notun Hukum Ekta

³¹ Karone, jitia Judas ulai jaise, Jisu koise, “Etiya Manu laga Putro mohima hoise, aru Tai dwara Isor mohima hoise. ³² Isor pora taike mohima koribo Tai nijor aru Taike joldi mohima hobo dibo. ³³ Chutu bacha khan, Moi olop somoi tumikhan logote ase. Tumikhan Moike bisaribo, aru Moi Yehudi cholawta khan ke kowa nisena, ‘Moi kot te jai ase, ta te tumikhan ahibo na paribo. Etiya Moi pora tumikhan ke koi ase. ³⁴ Moi tumikhan ke notun hukum di ase, tumikhan ekjon-ekjon ke morom koribi; Moi tumikhan ke morom kora nisena, tumi bhi ekjon-ekjon ke morom koribi. ³⁵ Etu karone sob manu pora tumikhan to Moi laga chela ase koi kene

jani lobo, jodi tumikhan ekjon-ekjon ke morom korile.

Peter He Jisu Ashikar Kora

³⁶ Simon Peter Taike koise, “Probhu, Apuni kote jabole ase?” Jisu taikhan koise, “Moi kote jabole ase, tumi etiya Moi laga piche ahibo na paribo, kintu pichete tumi Ami laga piche ahibo.” ³⁷ Peter Taike koise, “Probhu, kele, moi etiya Apuni laga piche ahibo napare? Moi to Apuni karone nijor jibon bhi dibo.” ³⁸ Jisu taike koise, “Tumi Moi nimate tumi nijor jibon dibo? Hosa pora Moi tumike kobo, jitia tak tumi tin bar Moike najane nokoi, titia tak murga hala nokorile.”

14

Moi He Rasta, Hosa Aru Jibon Ase

¹ “Tumi laga mon chinta nohobi. Tumi Isor ke biswas koribi, aru Moike bhi biswas koribi. ² Ami laga Baba laga ghor te jagah bisi ase, jodi nohoi, to Moi tumikhan ke koi dibo, kelemane Moi tumikhan karone jagah taiyar kori bole jai ase. ³ Aru jodi Moi jai kene tumikhan karone jagah taiyar kori loile, Moi aru ahikena tumikhan ke loijabo, aru kot te Moi thakibo ta te tumikhan ke bhi thakibo dibo. ⁴ Tumikhan Moi kot te jai ase etu rasta jani kene ase.” ⁵ Thomas pora Jisu ke koise, “Probhu, amikhan najane Apuni kot te jai ase, tinehoile amikhan kineka rasta janibo?” ⁶ Jisu taike koise, “Moi he rasta ase, aru hosa ase aru jibon ase; kun bhi Baba logote jabo napare Moi pora nohoile. ⁷ Jodi tumikhan

Moike janile, Moi laga Baba ke bhi janibole asele. Aru etiya pora tumikhan jani loise, aru Taike dikhi loise.” ⁸ Philip pora Jisu ke koise, “Probhu, amikhan ke Baba dikhai dibi, etu he amikhan karone kafi hobo.” ⁹ Jisu taike koise, “Philip, Moi iman din tumikhan logote ase tumi etiya bhi Moike janibo para nai? Jun Moike dikhise tai bhi Baba ke dikhi loise. Kineka tumi koi ase, ‘Amikhan ke Baba dikhai dibi’?” ¹⁰ Tumikhan biswas nakore Moi Baba logot aru Baba Moi logote ase kowa to? Ki kotha Moi tumikhan ke koise, Moi nijor khushi pora kowa nohoi, kintu Baba he Ami logote thake aru Ami dwara Tai laga kaam kori thake. ¹¹ Moi Baba logote ase koi kene biswas koribi, aru Baba Ami logote ase koi kene biswas koribi, nohoile kaam khan saikene hoile bhi Moike biswas koribi. ¹² Hosa, pora Moi tumikhan ke kobo, jun Moike biswas koribo, tai Moi ki kaam korise, tai bhi koribo, aru tai etu pora bhi bisi dangor kaam koribo kelemane Moi Baba logote jai ase. ¹³ Tumikhan Ami laga naam pora ki mangibo, eitu khan sob Moi koribo, Putro nimate Baba mohima hobo karone. ¹⁴ Jodi tumikhan Moi laga naam pora mangibo, Moi etu kori dibo.

Jisu Pora Pobitro Atma Laga Protigya Dise

¹⁵ Jodi tumikhan Moike morom kore, Ami laga hukum khan manibo, ¹⁶ Aru Moi pora Baba ke prathana koribo, aru Tai tumikhan karone aru dusra ekjon Modot Diya Jon pathai dibo, Tai hodai tumikhan logote thaki jabo- ¹⁷ etu hosa laga Atma ase. Duniya pora Taike janibole para nai kelemane etu Taike nadikhe, aru najane.

Kintu tumikhan to jane, kelemane Tai tumikhan logote thake aru tumikhan bhitor te thake. ¹⁸ Moi tumikhan ke anath hobo nadibo*; Moi tumikhan logote wapas ahibo. ¹⁹ Olop homoi karone etu duniya te Moike nadikhibo, kintu tumikhan to Moike dikhibo. Kelemane Moi jinda ase, tumikhan bhi jinda thakibo. ²⁰ Utu din tumikhan janibo Moi Baba logote ase, aru tumikhan Ami logote aru tumikhan logote Moi ase. ²¹ Kun pora Ami laga hukum khan loi ase aru cholai thake, taikhan he Moike morom kora khan ase, aru kun Moike morom kore, Baba bhi taike morom koribo, aru Moi taike morom koribo aru taike Moi nijor dikhai dibo.” ²² Judas -Iscariot nohoi- Jisu ke koise, “Probhu, kele Apuni nijorke amikhan logot dikhai dibo, kintu prithibi ke nohoi, etu kineka hobo?” ²³ Jisu jowab dikena taike koise, “Jodi kun bhi Moike morom kore, tai Ami laga kotha rakhibo. Moi laga Baba taike morom koribo, Ami duijon bhi tai logote ahibo aru tai logote Ami laga ghor bonabo. ²⁴ Jun Moike morom nakore, tai Ami laga kotha khan ke narakhe, aru ki kotha tumikhan huni loise, etu Ami laga kotha nohoi kintu Baba laga ase, Jun pora Moike pathaise.

²⁵ Moi eitu khan sob kotha koi dise, tumikhan logote thaka somoite. ²⁶ Kineka, Modot Diya Jon, Pobitro Atma, jun Baba he Ami laga naam pora pathai dibo- Tai sob apnikhan ke sikhai dibo, aru ki Moi apnikhan ke koise etu sob apnikhan ke aru bhi monte ahibo dibo. ²⁷ Moi apnikhan ke

* **14:18** 14.18 Yate motlob to hosa pora anath huwa nohoi, kintu kitia bhi ekla nacharibo laga motlob ase.

shanti rakhidibo; Moi apuni ke Ami laga shanti di ase. Moi diya to prithibi pora diya nisena nohoi. Tumi laga mon chinta nohobi aru bhoi nokoribi. ²⁸ Moi eneka kuwa apnikhan hunise, ‘Moi jai ase, aru Moi apuni khan logote wapas ahibo.’ Jodi apnikhan Moike morom kore, apnikhan etu pora khushi hobo lage, Moi Baba logote jai ase, kelemane Moi nohoi kintu Baba he dangor ase. ²⁹ Etu sob huwa age te Moi apnikhan ke koidi ase, jitia etu sob hoi jabo, titia apnikhan biswas kori lobo. ³⁰ Moi apnikhan logote bisi kotha nakoribo, kelemane etu prithibi laga cholawta† ahi ase. Tai Moike eku koribo na paribo, ³¹ kintu Moi Baba ke morom kora prithibi ke jonai dibo karone aru jineka Baba he Moike hukum dise eitu khan sob kori thake, uthibi Amikhan yate pora jai jabo.”

15

Moi Asol Angur Gash Ase

¹ “Moi asol angur ghas ase, aru Moi laga Baba he bagan kora jon ase. ² Moi pora ula daal juntu te jodi phol nulai, Tai etu hatai diye; aru kuntu daal pora phol dibo, Tai etu pora aru bisi phol dibo karone bhal pora sai rakhi diye. ³ Moi tumikhan ke koi diya kotha pora tumikhan sapha hoise. ⁴ Ami logote thakibi, aru Moi bhi tumi logote thakibo. Jodi daal to ghas te nathakile nijor phol dibo napare, tineka tumikhan bhi Ami logote nathakile phol dibo na paribo. ⁵ Moi angur ghas ase aru tumikhan daal khan ase. Jun Ami logote thake aru Moi tai logote thake, tai bisi

† **14:30** 14.30 Saitan.

phol dibo, kelemane tumikhan Moi pora alag hoi kene eku koribo napare. ⁶ Jodi kunba Ami logote nathake, taike phelai dibo, aru ekta daal nisena, sukhi jabo, aru manu pora etu joma kori kene jui te di dibo, aru eitu khan ke jolai diye. ⁷ Jodi tumikhan Moi logote thake, aru Ami laga kotha tumikhan logote thake, tumi ki lage etu mangibi, titia etu tumikhan karone kori dibo. ⁸ Tumi laga phol bisi ulaile Baba laga mohima hobo, aru etu pora tumikhan Ami laga chela koribo paribo. ⁹ Jineka Baba Moike morom korise, tineka Moi bhi tumikhan ke morom korise. Ami laga morom te thakibi. ¹⁰ Jodi tumi Ami laga hukum manile, Ami laga morom te thakibo, jineka Moi Baba laga kotha mani ahise aru Taike morom kori ahise. ¹¹ Moi etu kotha tumikhan ke etu karone koise, Ami laga anond tumikhan logote thaki bole, aru tumi laga anond pura hobo karone. ¹² Etu Ami laga hukum ase, tumikhan ekjon-ekjon ke morom koribi jineka Moi tumikhan ke morom kore. ¹³ Kunba tai sathi khan karone nijor jibon diya- etu pora dangor morom aru nai. ¹⁴ Tumi Ami laga sathi ase jodi tumi Moi diya hukum mani thakile. ¹⁵ Aru Moi tumikhan ke nokorkhan namatibo, kelemane nokor tai malik ki kore najane. Kintu Moi tumikhan ke sathi koise, kelemane Moi ki kotha Ami laga Baba pora hunise etu sob tumikhan ke koi dise. ¹⁶ Tumikhan Moike basi luwa nohoi, kintu Moi he tumikhan ke basi loise, aru tumikhan ke tel lagai kene pobitro kori loise, tumikhan phol dhora to hodai thaki bole karone. Eneka hoile, tumikhan Ami laga naam te Baba ke mangibo,

aru Tai etu tumikhan ke dibo. ¹⁷ Etu hukum Moi tumikhan ke di ase, tumikhan ekjon-ekjon ke morom koribi.

Duniya Pora Ghin Koribo

¹⁸ Jodi duniya pora tumikhan ke ghin korile bhi tumikhan jani ase, etu tumikhan age te Moike ghin korise. ¹⁹ Jodi tumikhan duniya laga ase, titia duniya pora tai nijor nisena morom kori bole thakise. Kintu tumikhan duniya laga nohoi, kintu Moi he etu duniya pora tumikhan ke basi loise, kelemane duniya tumikhan ke ghin kore. ²⁰ Ami pora kowa kotha yaad koribi, 'Ekjon nokor tai laga malik pora dangor nohoi.' Jodi taikhan pora Amike dukh dise koile, taikhan pora tumikhan ke bhi dukh dibo; jodi taikhan Ami laga kotha manile tumikhan laga kotha bhi manibo. ²¹ Kintu Moi karone etu sob tumikhan uporte koribo, kelemane taikhan Moike pathai diya ke najane. ²² Jodi Moi nahile aru taikhan ke nokoile, taikhan laga paap nathakibo asele, kintu etiya taikhan nijor paap karone eku bahana nai. ²³ Jun Moike ghin korise tai Ami laga Baba ke bhi ghin korise. ²⁴ Jodi Moi kun pora bhi koribo napara kaam kori dikhai diya nai koile taikhan laga paap nathakibo asele, kintu etiya taikhan Moi kori diya khan ke dikhise, aru Moi aru Moi laga Baba ke bhi ghin korise. ²⁵ Aru etu taikhan laga niyom te likha ase, 'Taikhan Moike eku golti nathaki kene ghin korise,' etu pura hoi jabo karone hoise*. ²⁶ Jitia Modot Diya Jonke Moi tumikhan logote pathabo Jun ase Baba pora aha

* **15:25** 15.25 Psa. 35.19, 69.4-5.

hosa Atma, etu he Amike gawah dibo. ²⁷ Kintu tumikhan bhi gawah ase kelemane shuru pora tumikhan Ami logote ase.

16

¹ “Tumikhan nagiribo karone Moi etiya sob koi ase. ² Taikhan tumikhan ke mondoli khan pora ulai dibo. Kintu somoi ahi ase, jitia tumikhan ke morai diya khan bhabibo taikhan Isor ke sewa te daan di ase. ³ Taikhan tineka sob koribo kelemane taikhan Baba aru Moike najana. ⁴ Kintu Moi tumikhan ke eitu khan sob koi dibo, eneka hoile jitia taikhan laga somoi ahibo, tumikhan bhabona ahibo Moi tumikhan ke koi diya to. Kintu Moi shuru te etu kotha tumikhan ke kowa nai, kele koile Moi tumikhan logote he thaka karone.

Pobitro Atma Laga Kaam

⁵ Kintu Moi etiya Moike pathai diya logote jai ase, kintu kun bhi eneka Moike huda nai, ‘Apuni kot te jabole ase?’ ⁶ Kintu Moi tumikhan ke etu kotha kowa karone, tumikhan mon dukh hoise. ⁷ Kintu Moi tumikhan ke hosa kobo, Moi jaile tumikhan karone bhal hobo. Karone jodi Moi najaile, Modot Diya Jon to tumikhan logote nahibo, kintu Moi ja pichete he, Moi Taike tumikhan karone pathai dibo. ⁸ Aru jitia Tai ahibo, Modot Diya Jon pora prithibi ke paap laga golti, dhormik kaam laga aru Isor pora bisar kora sob prithibi ke jonai dibo- ⁹ Paapkhan bhi, kelemane taikhan Moike biswas nakora karone; ¹⁰ aru dhormik kotha bhi, kelemane Moi Baba logote jai ase aru tumikhan Moike aru

nadikhibo; ¹¹ aru bisar kotha bhi, kelemane etu duniya laga cholawta khan ke bisar kori loise*. ¹² Moi etiya bhi tumikhan ke bisi kotha kobole ase, kintu tumikhan etiya etu dhorjo koribo na paribo. ¹³ Hoilebi jitia, Hosa laga Atma ahibo, Tai tumikhan ke sob hosa rasta dikhai dibo, kelemane Tai nijor pora eku bhi nokobo. Kintu Tai ki hune, Tai etu he kobo, aru ki ahibole ase etu sob tumikhan ke koi dibo. ¹⁴ Tai Moike mohima koribo, kelemane Tai Ami laga kotha loi kene tumikhan ke jonai dibo. ¹⁵ Sob bostu kuntu Baba laga ase, etu sob Moi laga ase. Etu karone, Moi koise Atma pora Moi laga kotha loi kene tumikhan ke sob jonai dibo.

Tumi Laga Mon Dukh Sob Khushi te Bodli Hobo

¹⁶ Olop somoi pichete tumikhan Moike nadikhibo, aru olop somoi pichete tumikhan Moike aru dikhibo.” ¹⁷ Titia Tai chela te kunba ekjon-ekjon kotha korise, “Tai amikhan ke ki koi ase, ‘Olop pichete tumikhan Moike nadikhibo, aru olop somoi pichete tumikhan Moike aru dikhibo,’ aru ‘kelemane Moi Ami laga Baba logote jai ase’? ¹⁸ Karone taikhan koise, “Etu Tai ki koi ase, ‘Olop somoi’? Amikhan najane.” ¹⁹ Jisu janise taikhan Taike hudibole mon kori ase, aru Tai koise, “Tumikhan apaste ‘olop somoi pichete tumikhan Moike nadikhibo, aru olop somoi pichete tumikhan aru Moike dikhibo’ kowa laga kotha ke huda-hudi kori ase? ²⁰ Hosa pora Moi tumikhan ke kobo, tumikhan kandibo

* **16:11** 16.11 John pora tai laga kitab te Saitan ke ‘Duniya laga cholawta’ eneka mate.

aru dukh koribo, kintu duniya to khushi koribo. Tumikhan mon dukh koribo, kintu tumikhan mon dukh kora to khushi te bodli hoi jabo. ²¹ Jitia maiki jonon dibole somoi ahijai, tai mon dukh kori thake, kelemane tai dukh somoi ahise, kintu jitia tai bacha ke jonon pai loi, tai dukh sob pahori jai kelemane ekjon etu duniya te jonon huwa karone†. ²² Karone tumikhan etiya mon dukh kori ase, kintu Moi tumikhan ke aru lok pabo, aru tumikhan mon khushi pabo, aru tumikhan laga anond kun bhi chingi loi najabo. ²³ Aru etu dinte tumikhan Moike eku bhi namangibo. Hosa, Moi tumikhan ke kobo, jodi tumikhan Ami laga naam pora Baba logote kiba mangile, Tai tumikhan ke dibo. ²⁴ Etiya tak tumikhan Ami laga naam te eku bhi manga nai. Mangibi, aru tumi pai jabo, aru tumi laga khushi pura hoi jabo.

Moi Prithibi Jiti Loise

²⁵ Moi etu tumikhan ke dristanto pora koi ase, kintu Moi tumikhan ke dristant nohoi kene khula- khuli pora Baba laga kotha kobole somoi ahi ase. ²⁶ Etu dinte tumikhan Ami laga naam pora mangibo, aru Moi tumikhan karone Baba pora mangibo kowa nohoi, ²⁷ kelemane Baba nijor tumikhan ke morom kore, kele koile tumikhan Moike morom korise, aru Moi Baba pora ahise koi kene tumikhan biswas korise. ²⁸ Moi Baba pora ahise, aru Moi duniya te ahise. Aru bhi, Moi duniya chari kene Baba logote jabole ase.” ²⁹ Tai chela khan koise, “Sabi, etiya to

† **16:21** 16.21 Isa. 26:17, Mic. 4:9.

Apuni dristanto pora nohoi kintu khula-khuli koi ase. ³⁰ Etiya amikhan jani loise Apuni sob jane koi kene, aru kunbi Apuni ke eku hudibole dorkar nai. Eitu khan nimate, amikhan biswas kori ase Apuni Isor pora ahise.” ³¹ Jisu taikhan ke hudise, “Tumikhan etiya biswas kori ase? ³² Sabi, etu somoi ahi ase, hoi ahi jaise, jitia tumikhan sob ephale-uphale hoi kene nijor ghor te jai jabo, aru Moike ekla chari dibo. Hoilebi Moi ekla nohoi kelemane Baba Moi logote ase. ³³ Moi apnikhan ke etu kotha koi dise karone apnikhan Moi pora shanti pabo. Etu prithibi te dukh pabo, kintu mon dangor koribi, Moi prithibi uporte jiti loise.”

17

Moha Purohit Laga Prathana

¹ Jisu pora etu sob kotha koi diya pichete Tai sorgo phale saikene prathana korise, “Baba, somoi ahi ponchise, Putro pora Apuni ke mohima koribo karone Chora ke mohima kori dibi-
² Apuni pora he sob manu uporte Taike adhikar dise aru etu pora he jun khan Apuni pora Taike dise, taikhan sobke anonto jibon pabo nimate.
³ Etu he anonto jibon ase: taikhan pora Apuni he hosa Isor ase koi kene janibole, aru Jisu Khrista ke Jun Apuni pathai dise. ⁴ Moi etu prithibi te Apuni ke mohima kori dise. Moi kaam khotom hoise juntu Apuni Moike kori bole dise. ⁵ Etiya, Baba etu duniya bona age te Moi Apuni logote mohima te thaka nisena, etiya Apuni logote mohima hobole dibi. ⁶ Moi Apuni laga naam taikhan ke dikhai dise, jun khan Apuni he duniya

pora Moike dise. Taikhan Apuni laga asele aru Apuni he taikhan ke Moi logote dise aru taikhan Apuni laga kotha mani loise. ⁷ Etiya taikhan jani loise, sob to Apuni Moike dise, sob Apuni pora ahise koi kene, ⁸ kelemane ki kotha Apuni Moike dise, Moi taikhan ke koi dise. Aru taikhan etu grohon kori loise, aru Moi, Apuni pora aha jani loise, aru Apuni he Moike pathaise etu ke biswas kori loise. ⁹ Moi taikhan karone prathana kori ase. Moi etu duniya karone kora nai, kintu jun khan Apuni Moike dise, kelemane taikhan Apuni laga ase. ¹⁰ Aru Ami laga ki ase, sob Apuni laga ase aru ki Apuni laga ase, sob Ami laga ase, aru Moi etu pora mohima hoise. ¹¹ Etiya Moi duniya te bisi din nathakibo, kintu eitu khan to duniya laga manu ase, aru Moi to Apuni logote ahi ase. Pobitro Baba, Apuni naam pora rakhi lobi jun khan Apuni Moike dise, taikhan ekta hobo dibi jineka Amikhan bhi ekta ase. ¹² Jitia tak Moi taikhan logote ase, Moi Apuni laga naam pora, ki Apuni Moike dise eitu khan roikhya korise. Aru taikhan kunke bhi harai diya nai, khali khotom hobo thaka ke nohoile*, jineka Shastro te likha ase etu pura hobo karone. ¹³ Kintu etiya Moi Apuni logote ahi ase, aru Ami laga khushi taikhan monte pura hobo karone Moi etu duniya te thaka somoite koi dise. ¹⁴ Moi Apuni laga kotha taikhan ke koi dise, aru duniya pora taikhan ke ghin korise, kelemane jineka Moi duniya laga nohoi tineka taikhan bhi duniya laga nohoi. ¹⁵ Moi taikhan ke etu duniya pora uthai

* **17:12** 17.12 Judas Iscariot ke koi ase, John 18:9.

loijabi koi kene Apuni ke prathana kora nohoi, kintu taikhan ke biya jon pora bachai rakhibi koi kene binti kori ase. ¹⁶ Taikhan duniya laga nohoi, jineka Moi duniya laga nohoi. ¹⁷ Taikhan ke hosa dikena alag kori lobi. Apuni laga kotha to hosa ase. ¹⁸ Jineka Apuni Moike duniya te pathaise, tineka Moi bhi taikhan ke duniya te pathai dise. ¹⁹ Aru taikhan karone Moi nijorke alag rakhise, taikhan bhi nijorke hosa pora alag rakhibo karone. ²⁰ Moi khali etu karone binti kora nohoi, kintu taikhan ke bhi, jun khan taikhan kotha pora Moike biswas koribo sob karone binti ase, ²¹ taikhan ke bhi ekta hobole dibi, jineka Apuni, Baba, Moi logote ase, aru Ami Apuni logote ase, eneka taikhan bhi Amikhan logote thaki bole, eneka pora duniya biswas koribo Apuni he Amike pathaise koi kene. ²² Aru mohima juntu Apuni Moike dise, Moi taikhan ke di dise, karone taikhan bhi ekta hobole nimite, jineka Amikhan ekta ase. ²³ Moi taikhan logote aru Apuni Ami logote- taikhan ekta hobole, aru Apuni he Moike pathaise koi kene prithibi he janibole, aru Apuni Moike morom kora nisena, taikhan ke bhi morom korise. ²⁴ Baba, Ami laga itcha ase jun khan Apuni Moike dise, taikhan bhi kot te Moi thakibo ta te Moi logote thaki bole, tinehoile taikhan Moi laga mohima ke dikhibo, kele koile duniya bona age te Apuni Moike morom kori ahise. ²⁵ Dharmik Baba, prithibi Apuni ke jana nai, kintu Moi Apuni ke jane; aru eitu khan to Apuni pora Moike pathaise koi kene jani loise. ²⁶ Aru Moi Apuni naam taikhan ke koi dise, aru koi thakibo, juntu morom Apuni Moike

dise, etu morom taikhan monte thaki bole, aru Moi taikhan logote thaki bole.”

18

Thogai Diya Aru Jisu Ke Dhura

¹ Titia Jisu etu kotha koi diya pichete, Tai chela khan ke loi Kidron Bhoyam kinar pora jaise, ta te ekta bagan asele, juntu jagate Tai aru chela khan jaise. ² Titia Judas, jun Taike thogai dibole ase, tai bhi etu jagah jani thakise, kelemane poila bhi Jisu Taikhan ke loi ta te jai thakisele. ³ Titia Judas, sipahi aru mukhyo purohit aru Pharisee aru adhikari khan sakhi, mashal, aru hathiar khan loi kene ahise. ⁴ Titia Jisu, etu sob jinis Tai upor ahibo thaka jani kene, Tai taikhan logote ahikena hudise, “Apnikhan kunke bisari ase?” ⁵ Taikhan Taike jowab dise, “Nazareth Jisu ke.” Jisu taikhan ke koise, “Moi ase.” Kintu Judas, Taike thogai dibole aru dhoribo thaka manu bhi sipahi khan logote khara thakise. ⁶ Karone jitia Tai taikhan ke koise, “Moi ase,” taikhan pichete hati kene matite giri jaise. ⁷ Titia Tai aru taikhan ke aru hudise, “Kunke tumikhan bisari ase?” Aru taikhan koise, “Nazareth Jisu ke.” ⁸ Jisu jowab dise, “Moi tumikhan ke koise Moi ase. Jodi tumikhan Moike bisari ase koile, poila eitu khan ke jabo dibi.” ⁹ Etu pura kori bole karone hoise jun to kotha Tai age te koisele; “Apuni Moike diya khan, Moi ekjon ke bhi harai diya nai*.” ¹⁰ Titia Simon Peter logote talwar thakise, aru tai etu ke ulaikene moha purohit nokor laga dyna kaan

* **18:9** 18.9 John 17:12.

kati dise. Etu nokor laga naam Malchus asele. ¹¹ Karone Jisu Peter ke koise, “Tumi laga talwar nijor jagate rakhi dibi. Juntu kup Baba he Moike dise, Moi etu pora khabo nalage naki?”

Moha Purohit Age Te Jisu

¹² Titia Rome laga sipahi khan aru taikhan laga sahab aru Yehudi khan laga adhikari khan Jisu ke dhori loise aru Taike bandhi loise. ¹³ Aru prothom te, Taike loi kene Annas logote jaise, jun Caiaphas laga sasur asele, jun he etu saal pora moha purohit kaam kori asele. ¹⁴ Aru poila dinte Yehudi khan ke nirdes diya, jun koise sob manu nost huwa pora ekjon mori juwa he bhal ase kowa to etu Caiaphas he asele.

Peter Pora Jisu Ke Tyag Kora

¹⁵ Kintu Simon Peter aru dusra ekjon chela bhi Jisu ke piche kori ahise. Aru etu chela to moha purohit logote chihnaki thakisele, karone tai Jisu logote moha purohit laga veranda te jaise; ¹⁶ kintu Peter to dorja laga bahar te khara hoise. Titia dusra chela jun he moha purohit logote chihnaki ase, bahar jai kene dorja rukhi thaka mahila ke koi kene Peter ke bhitor loi anise. ¹⁷ Titia etu nokorni jun he dorja ke sai thakise, tai Peter ke koise, “Apuni bhi etu manu laga chela nohoi?” Tai koise, “Moi to nohoi.” ¹⁸ Etu jagate nokorkhan aru adhikari khan khara asele, aru taikhan thanda laga karone jui thapi thakise, aru Peter bhi taikhan logote khara kori jui thapi thakise.

Moha Purohit Pora Jisu Ke Huda

19 Titia moha purohit Jisu ke tai chela khan laga kotha aru tai laga updesh laga kotha hudise. 20 Jisu taike jowab dise, “Moi khuli kene jogot ke koi dise, Moi hodai mondoli te aru mondoli te, kot te Yehudi khan joma kori thake, ta te sikhai thakise, aru eku bhi lukai kene kowa nai. 21 Kile tumikhan Moike hudi ase? Hudi bhi jun hunise Moi taikhan ke kowa kotha khan. Sabi, taikhan sob jani ase Moi ki koise.” 22 Jitia Jisu etu koise, ta te thaka ekjon adhikari khara kori thaka pora Jisu ke thapor mari koise, “Kile Apuni moha purohit ke eneka jowab dibo?†” 23 Jisu taike jowab dise, “Jodi Moi biya kotha koile, etu biya kotha laga sabut dibi, kintu jodi etu thik ase koile tumi Moike kele marise?” 24 Titia Annas pora Tai hath bandi kene moha purohit Caiaphas logote pathai dise.

Peter Pora Jisu Ke Arubi Tyag Kora

25 Simon Peter khara hoi kene jui thapi thakisele. Titia taikhan koise, “Apuni bhi Tai chela te ekjon nohoi?” Tai koise, “Moi to nohoi.” 26 Maha purohit laga ekta nokor jun laga kaan Peter he kati dise, etu khandan manu ekjon koise, “Apuni bhi Tai logote thaka moi bagan te apuni ke dikha nohoi?” 27 Peter aru nohoi koise aru etu kowa logote, ekta murga hala korise.

Pilate Usorte Jisu

28 Titia taikhan Jisu ke Caiaphas logote prodhan sorkari kendra te loi jaise. Kintu etu somoi phojur asele, aru taikhan prodhan sorkari kendra te loi juwa nai kelemane Nistar khabole

† 18:22 18.22 Luke 22:63, Mic. 5:1

thaka karone taikhan letera hoi jabo bhabona laga bhoi pora‡. ²⁹ Pilate taikhan logote ahikena koise, “Tumikhan etu manu ke ki golti lagai kene yate anise?” ³⁰ Taikhan taike jowab di koise, “Jodi Tai biya kaam nakorile, amikhan Taike apuni usorte loi nahibole asele.” ³¹ Karone Pilate taikhan ke koise, “Loijabi tumikhan Taike, aru tumikhan laga niyom hisab pora Taike bisar koribi.” Yehudi khan taike koise, “Amikhan laga niyom te kunke bhi mora bole adhikar nai.” ³² Jisu Tai nijor kineka kori mori bole ase, Tai nijor koi diya ke pura hobo karone etu eneka hoise.

Moi Laga Rajyo To etu Duniya Laga Nohoi

³³ Titia Pilate prodhan sorkari kendra jagate ahi kene Jisu ke matise, aru Taike koise, “Apuni Yehudi laga Raja ase?” ³⁴ Jisu taike jowab dise, “Etu kotha tumi nijor koi ase, na kunba Ami laga kotha tumike koise?” ³⁵ Pilate jowab dise, “Moi Yehudi ase, na nohoi? Tumi laga jati aru mukhyo purohit khan he Apuni ke moi laga hathte dise. Apuni ki korise?” ³⁶ Jisu jowab dise, “Moi laga rajyo etu duniya laga nohoi. Jodi etu duniya laga hoile, manu pora Moike dhori kene Yehudi khan ke nadibo karone, Ami laga nokorkhan lorai koribo asele. Kintu Moi laga rajyo to yate nohoi.” ³⁷ Karone Pilate Taike koise, “Tinehoile, Apuni ekjon Raja ase?” Jisu jawan dise, “Apuni thik koise, Moi raja ase. Kelemanee etu karone, Moi jononm loise aru ahise, hosa laga gawahi dibo nimite. Karone, jun manu hosa te thake Ami laga

‡ **18:28** 18.28 Num. 9:9-11.

awaj huni thake§.” ³⁸ Pilate Taike koise, “Hosa to ki ase?” Aru tai etu koi kene Yehudi khan logote aru jaise aru koise, “Moi to Tai uporte eku golti paa nai. ³⁹ Kintu tumikhan niyom te Nistar Purbb te moi pora ekjon ke tumikhan karone chari dibole ase, karone moi tumikhan Yehudi laga Raja ke chari dile tumi laga itcha hobo?” ⁴⁰ Titia taikhan aru bisi hala kori koise, “Etu manu nohoi kintu Barabbas ke dibi.” Barabbas ekjon dokait asele.

19

Jisu Cross Te Mora bole Dise

¹ Titia Pilate pora Jisu ke loijai kene chabuk maribo dise. ² Aru sipahi khan kata mukut bonaise. Aru Jisu laga matha te hali dise aru begoni rong laga kapra Taike pindhai dise. ³ Aru Tai usorte ahi kene, salam korise aru Taike tha-por marikena koise, “Yehudi laga Raja!” ⁴ Titia Pilate aru bahar ahikena Taikhan ke koise, “Sabi, moi Tai pora eku golti pa-a, nai karone tumikhan ke jonai dibole Taike loi kene tumikhan logote ahi ase.” ⁵ Titia Jisu kata mukut aru begoni rong kapra lagai kene bahar te ulai ahise. Pilate taikhan ke koise, “Sabi, etu manu yate ase!” ⁶ Jitia mukhyo purohit khan aru adhikari khan Jisu ke dikhise, taikhan jor pora hala kori koise, “Taike Cross te morai dibi, Taike Cross te morai dibi!” Pilate taikhan ke koise, “Tumikhan he Taike loijai kene morai dibi, kelemane moi to Tai pora eku golti paa nai.” ⁷ Yehudi khan taike jowab dise, “Amikhan bhi niyom ase, aru etu

§ 18:37 18.37 1 John 4:6.

niyom hisab te Tai moribo lage, kelemane Tai nijorke Isor laga Putro kowa karone*.” ⁸ Karone jitia Pilate etu kotha hunise, tai aru bisi bhoi khai jaise. ⁹ Aru tai prodhan sorkari kendra te jaise, aru Jisu ke koise, “Apuni kot pora ahise?” Kintu Jisu taike eku jowab diya nai. ¹⁰ Titia Pilate Taike koise, “Apuni moike eku nakobo? Apuni najane moi Apuni ke chari dibole bhi adhikar ase, aru Apuni ke latkai dibole bhi adhikar ase?” ¹¹ Jisu taike koise, “Apuni ke upor pora hokti nadile Ami logote eku adhikar nathakibole asele, karone jun Moike dhori kene tumi laga hathte dise etu manu laga paap bisi hoise.” ¹² Etu jowab pora Pilate Taike chari dibole bhabi loise, kintu Yehudi cholawta khan hala kori koise, “Jodi apuni etu manu ke chari dile, apuni Caesar laga sathi nohoi. Kun tai nijorke raja koribo kosis kore, tai Caesar bhirodhi ase.” ¹³ Jitia Pilate etu kotha hunise, tai Jisu ke loi bahar ulaise, aru bisar kora singhason te bohise, utu jagah ke “Pavement” mate, kintu Ibrani kotha te “Gabbatha” koi. ¹⁴ Etu somoi to Nistar Purbb laga taiyari kora din asele, aru baroh baji asele, aru tai Yehudi khan ke koise, “Sabi, tumikhan laga Raja!” ¹⁵ Kintu taikhan hala kori, “Taike loijabi, Taike loijabi; Taike Cross te morai dibi!” Pilate taikhan ke koise, “Kile tumikhan laga Raja ke moi Cross te dibo?” Mukhyo purohit khan koise, “Amikhan Caesar nohoile dusra raja nai.” ¹⁶ Titia tai Jisu ke Cross te dibole taikhan hathte di dise, karone taikhan Jisu ke loi jaise.

* **19:7** 19.7 Lev. 24:16.

Cross Te Morai Diya

¹⁷ Aru Jisu nijor Cross loi kene ekta jagah te jaise juntu ke “Matha laga Hardi jaga” koi, jun to Ibrani kotha te “Golgotha” koi. ¹⁸ Ta te taikhan Jisu ke Cross te dise, aru dusra duijon ke bhi ekjon ephale aru dusra uphale korise, aru Jisu ke majote dise. ¹⁹ Aru Pilate ekta dosh potro likhi kene Cross te dise, aru eneka likha asele: NAZARETH LAGA JISU, YEHUDI KHAN LAGA RAJA.” ²⁰ Karone, bisi Yehudi khan etu porhise, kelemane Jisu ke latkai diya jaga to sheher usorte thakise. Aru etu chihna ke Ibrani, Latin aru Yunani pora kotha te likhi rakhise, ²¹ Titia mukhyo purohit khan aru Yehudi khan Pilate ke koise, “Eneka nalikhibi, ‘Yehudi laga Raja,’ kintu Tai he nijor he koi, ‘Moi Yehudi laga Raja ase.’ ” ²² Pilate jowab dise, “Ki Moi likhise, etu likhi dise.”

²³ Jitia sipahi khan Jisu ke Cross te latkai dise aru Tai kapra khan char bhag kori sob sipahi ekta-ekta bhag loise, aru Tai kurta bhi, kintu kurta to silai nathaka, upor pora niche tak bona asele. ²⁴ Karone taikhan apaste kotha korise, “Amikhan etu kurta to naphatai kene chithi kheli koribo, kun naam te ulabo tai he loi lobo†.” Kelemane Shastro te likha ase, “Taikhan Ami laga kapra bhangai loise Aru Moi laga kurta loi chithi kheli loise.”

Karone sipahi khan etu kori loise. ²⁵ Ta te Jisu Cross usorte Tai laga ama aru ama laga bhoini, Clopas laga maiki Mary, aru Mary Magdalene khara asele. ²⁶ Jitia Jisu Tai laga ama aru Tai

† 19:24 19.24 Psa. 22:18.

morom kori thaka chela khara thaka dikhi kene Tai laga ama ke koise, “Mahila, sabi, apuni laga chokra!” ²⁷ Titia Tai chela ke bhi koise, “Sabi, apuni laga ama!” Aru etu somoi pora chela pora taikhe nijor ghor te loi jaise.

Jisu Mora

²⁸ Etu pichete, Shastro te likha khan sob pura hoise janikena Jisu koise, “Moi pyaas lagise.” ²⁹ Ta te ekta daba te tenga pani bhorta rakhi asele, taikhan kopas te tenga pani bhi jai kene Tai mukh te dise‡. ³⁰ Jitia Jisu etu tenga pani loise, Tai koise, “Etu pura hoise.” Aru Tai matha niche kori Tai atma di dise§.

Jisu Laga Panjar Te Jathi Ghusai Diya

³¹ Titia Yehudi khan, kelemane etu taiyar kora din asele, karone gaw to Bisram dinte Cross te narakhi bole - kelemane etu Bisram din to khas din asele,- Pilate logote hudise theng bhangai dibole aru taikhan ke namai dibole*. ³² Titia sipahi khan ahi prothom laga theng bhangai dise, aru dusra laga bhi junke Jisu logote latkai disele. ³³ Kintu jitia Taikhan Jisu usorte ahise, Tai mori juwa dikhikena Tai laga theng bhangai diya nai. ³⁴ Hoilebi, sipahi ekjon tai laga jathi loi kene Tai laga pet te ghusai dise, aru khun aru pani ulaise. ³⁵ Aru jun dikhise tai gawahi dise, aru tai laga gawahi to hosa ase. Tai jane tai hosa koise, karone tumikhan bhi biswas koribi. ³⁶ Kelemane Shastro te “Tai laga hardi ekta bhi na bhangabo,

‡ **19:29** 19.29 Psa. 69:21. § **19:30** 19.30 Luke 23:46; Mark 15:37. * **19:31** 19.31 Deu. 21:22-23; Mark 15:42.

etu pura hobo karone eneka hoise†.” ³⁷ Aru, dusra Shastro te koise, “Taikhan nijor jathi pora mari diya ke nijor sabo‡.”

Jisu Ke Kobor Diya

³⁸ Etu sob huwa pichete, Arimathia laga manu Joseph, jun Jisu laga chela asele, -kintu Yehudi khan ke bhoi pora lukai thakise-, Pilate logote ahi Jisu laga gaw ke loi jaboile mangise. Pilate taikhe dibole hukum dise. Karone Joseph ahikena Jisu laga gaw loi jaise. ³⁹ Nicodemus bhi ahisele, age te jun manu rati te Jisu logote ahisele. Tai myrrh aru aloe khan anise, aru etu to milai kene eksoh pound§ nisena thakise. ⁴⁰ Titia taikhan Jisu laga gaw loi kene Yehudi laga moidam diya niyom hisab te mihin kapra loi mitha sugandh tel pora milai loise. ⁴¹ Aru kun jagate Jisu ke latkai dise, ta te ekta bagan thakise, aru etu bagan te ekta notun kobor thakise, kitia bhi nachola laga thakise. ⁴² Aru etu din Yehudi khan laga taiyari din asele, aru etu kobor bisi dur bhi nohoi, karone taikhan Jisu ke ta te he rakhidise.

20

Punoruthan Huwa

¹ Hapta laga prothom dinte, arubi andhera thaka homoi te, Mary Magdalene kobor te ahise, aru kobor pora pathor ke hatai diya dikhi paise. ² Titia tai dauri ahikena Simon Peter aru dusra chela junke Jisu morom kore, taikhan ke koise,

† **19:36** 19.36 Exo. 12:46; Num. 9:12; Psa. 34:20. ‡ **19:37** 19.37 Zec. 12:10. § **19:39** 19.39 Itu laga ujon to 30 kgs nisina ase.

“Manu khan Probhu ke kobor pora uthai loi jaise, aru amikhan najane Taike kote loi rakhidise.”
³ Titia Peter aru dusra chela duijon ulaikene kobor te jaise. ⁴ Aru duijon polai jai asele, hoilebi dusra chela he Peter pora age kobor te ponchise. ⁵ Aru tai jhuki kene bhitor te saise, aru mihin kapra thaka paise, kintu tai bhitor te juwa nai. ⁶ Titia Simon Peter tai piche-piche ahise, aru kobor bhitor te jaise. Tai mihin kapra ta te thaka paise ⁷ aru Tai matha bandi rakha kapra dikhise. Etu kapra to mihin kapra logote nohoi kintu alag jagate bhal pora lipai kene thaka paise. ⁸ Titia dusra chela jun prothom kobor te ponchise, aru bhitor jaise aru dikhi kene biswas korise. ⁹ Kelemanee taikhan etiya tak Tai mora pora jee uthijabo lage, eneka Shastro te kowa ke bujha nai*. ¹⁰ Titia chela khan nijor ghor te wapas jai jaise.

Mary Magdalene Logot Te Jisu Ahise

¹¹ Kintu Mary to kobor bahar te khara kandi thakise, aru jhuki kene kobor bhitor te saise. ¹² Aru sorgodoth duijon ujala kapra pindhi kene kuntu jagate Jisu laga gaw rakhise, ta te ekjon matha phale aru dusra Tai theng phale thaka paise. ¹³ Titia taikhan taikhe koise, “Mahila, kele tumi kandi ase?” Tai taikhan ke koise, “kelemanee ami laga Probhu ke uthai loi jaise, aru taikhan Taike kot te rakhidise moi najane.” ¹⁴ Tai etu koi kene piche phale saise, aru Jisu ke ta te khara dikha paise, kintu tai etu Jisu ase koi kene jana nai. ¹⁵ Jisu taikhe koise, “Mahila kele tumi

* **20:9** 20.9 Psa. 16:10.

kandi ase? Tumi kunke bisari ase?” Tai maali ase bhabi kene Taike koise, “Sahab, jodi apuni Taike loi jaise koile Taike kot te rakhidise moike koi dibi tinehoile moi Taike loijabo.” ¹⁶ Jisu taike koise, “Mary.” Tai piche ghuri kene Taike koise Ibrani kotha pora koise, “Rabboni”- mane “Shika manu”. ¹⁷ Jisu taike koise, “Moike na chubi, kelemane Moi etiya Baba logot uporte juwa nai kintu Ami laga bhai khan logote jai kene koi dibi, Moi Ami laga Baba aru tumikhan laga Baba, Ami laga Isor aru tumikhan laga Isor, Tai logote uporte jai ase.” ¹⁸ Mary Magdalene ahi kene chela khan ke koise, “Moi Probhu ke dikhise,” aru Tai he taike etu sob kotha koise koi kene.

Jisu Chela Khan Logot Ahi Dikhaise

¹⁹ Karone, hapta laga prothom din laga saam te chela khan joma korise, taikhan Yehudi khan ke bhoi pora dorja bondh kori rakhise, titia Jisu ahi taikhan majote khara hoise, aru taikhan ke koise, “Shanti hobi tumikhan.” ²⁰ Aru etu kowa pichete Tai hath aru Tai panjar taikhan ke dikhai dise. Titia taikhan Probhu ke dikhi anondo korise. ²¹ Titia Jisu koise, “Shanti hobi tumikhan. Jineka Baba he Moike pathaise tineka Moi tumikhan ke pathai ase.” ²² Aru jitia Jisu etu koi dise, Tai pora taikhan ke phuki dise, aru koise, Tumikhan “Pobitro Atma grohon kori lobi. ²³ Tumikhan kun laga paap ke khyama kori dise, taikhan khyama pai jabo; aru tumikhan jun laga paap rakhidibo, etu paapkhan thaki jabo.”

Jisu Aru Thomas

²⁴ Kintu Jisu pora baroh jon logote aha somoite Thomas Didymus to chela thaka nai. ²⁵ Dusra chela koise taike, “Amikhan Probhu ke dikhise.” Kintu tai taikhan ke koise, “Jitia tak moi Tai hathte gojal daag nadikhibo, aru nijor anguli pora gojal laga chenda te hath na nadhalibo, moi biswas nakoribo.”

²⁶ Aru ath din pichete Tai chela khan ghor te joma thakisele, aru Thomas bhi taikhan logote thakise. Jisu ahise aru dorja bondh thakise, aru taikhan majote khara koi kene koise, “Shanti hobi tumikhan.” ²⁷ Titia Tai Thomas ke koise, “Tumi laga anguli yate loi anibi aru Ami laga hath sabi. Aru tumi laga hath loi yate anibi, aru Ami laga panjar te halibi aru abiswasi nathakibi, kintu biswas koribi.” ²⁸ Aru Thomas Taike koise, “Ami laga Probhu aru ami laga Isor.” ²⁹ Jisu taike koise, “kelemanee tumi Moike dikhi kene biswas korise. Dhonyo ase jun khan dikhi nai, aru biswas kori loise.”

Etu Kitab Laga Kotha

³⁰ Jisu aru bhi bisi chihna Tai chela khan usor pora kori dise, etu kitab te nalikha aru bhi bisi ase, ³¹ kintu etu sob likhi rakhise, kelemanee, Jisu he Khrista, jun Isor laga Putro ase etu biswas kori bole, aru biswas pora Tai naam te jibon pabo karone ase. Amen.

21

Sat Jon Chela Logot Te Jisu Ula

¹ Etu huwa pichete, arubi Jisu Tai nijor chela khan ke dikhai dise Tiberias nodi kinar te. Tai eneka taikhan ke dikhai dise: ² -Simon Peter

aru Didymus kowa Thomas, aru Galilee jaga laga Cana town pora Nathaniel aru Zebedee laga duijon chokra aru Tai chela khan kunba eke logote asele. ³ Simon Peter taikhan ke koise, “Moi maas dhori bole jai ase.” Taikhan koise, “Amikhan bhi apuni logote jabo.” Titia taikhan joldi jai kene ekta naw te bohi jaise, kintu etu rati taikhan eku bhi pa-a nai. ⁴ Jitia phojur hoise, Jisu nodi kinar te khara thakise, hoilebi chela khan etu Jisu ase koi kene jana nai. ⁵ Karone Jisu taikhan ke koise, “Jawan khan, khabole kiba ase?” Taikhan Taike koise, “Nai.” ⁶ Titia Tai taikhan ke koise, “Naw laga dyna phale tumikhan jal hali dibi, titia tumikhan kiba pabo.” Titia taikhan jal hali dise, aru maas bisi dhori luwa karone tanibo para nai. ⁷ Titia juntu chela ke Jisu morom kore, tai pora Peter ke koise, “Etu Probhu ase.” Jitia Simon Peter etu kotha hunise, tai laga bahar kapra pindhi loise- kelemane tai kapra nalagai kene thakise- aru samundar te jap marise. ⁸ Kintu dusra chela khan chutu naw te ahise- kelemane taikhan kinar te jabole bisi dur nohoi, dui-sou hath lamba nisena he ase- aru taikhan maas bhorta thaka jal ke tani ani loise. ⁹ Jitia taikhan joldi matite ahi jaise, taikhan jui laga koila te maas rakhi thaka, aru roti dikhise. ¹⁰ Jisu taikhan ke koise, “Tumikhan etiya dhori luwa pora maas olop anibi.” ¹¹ Simon Peter naw te jai kene dangor maas pora bhorta thaka jal ke matite tani anise; ta te bisi thakise hoilebi jal to phata nai. ¹² Jisu pora taikhan ke koise, “Ahibi aru nashta kori lobi.” Kintu ekjon chela khan bhi Taike hudibo mon dangor kora nai, “Apuni

kun ase?" Kelemanee Tai he Probhu ase koi kene taikhan jani loise. ¹³ Jisu ahise aru roti aru maas loi kene taikhan ke dise. ¹⁴ Etu tin bar asele Jisu Tai mora pora ji uthija pichete chela khan ke nijor dikhai dise.

Jisu Aru Peter

¹⁵ Jitia nashta kori loise, Jisu Simon Peter ke koise, "Simon Peter, Jonah laga chokra, tumi eitu khan pora bhi Moike bisi morom kore?" Peter Tai koise, "Hoi Probhu moi Apuni ke morom kora Apuni jane." Jisu taikhe koise, "Ami laga mer khan ke khila bhi." ¹⁶ Tai taikhe aru koise dusra bar, "Simon Jonah laga chokra, tumi Moike morom kore?" Peter Taike koise, "Hoi Probhu, Apuni he jane moi Apuni ke morom kore." Jisu taikhe koise, "Ami laga mer khan ke roikhya koribi."

¹⁷ Tai taikhe koise tin bar, "Simon Jonah laga chokra, tumi Moike morom kore?" Peter udas hoise kelemanee Jisu taikhe tin bar kowa karone, "Moike morom kore?" Tai koise, "Probhu, Apuni he sob jane, moi Apuni ke morom kore." Jisu taikhe koise, "Ami laga mer khan ke khila bhi. ¹⁸ Hosa pora Moi tumike kobo, tumi jawan somoite tumi nijor komor bandi kot te jabole mon kore ta te jai thakisele, kintu jitia tumi bura hoi jabo, tumi hath uthaikene dusra pora tumike kapra pindhai aru tumi kot te jabole mon nakore ta te loijabo." ¹⁹ Titia Jisu etu kowa motlob to Peter kinika moribo aru Isor ke mohima kori bole ase, etu dikhai dibole kowa hoise, aru Tai Peter ke koise, "Ami laga piche koribi."

Jisu Pora Bisi Morom Kora Chela

²⁰ Titia Peter ghuri piche saise, aru junke Jisu morom kore etu chela jun bhoj kora somoite thik Jisu laga chati usorte jhuki kene hudise, “Probhu, Apuni ke thogai dibole thaka kun ase?”

²¹ Karone Peter taike dikhi kene Jisu ke koise, “Kintu Probhu, etu manu kineka hobo?” ²² Jisu taike koise, “Jodi Moi kobo Moi aru wapas naha tak, taike thaki bole dibo mon korile tumi ki hoise? Tumi Ami laga piche koribi.” ²³ Karone etu chela namoribo koī kene bhai khan majote kotha kori thakise, kintu Jisu taike etu chela namoribo kowa nai kintu, “Jodi Moi aru naha tak taike thaki bole dibo mon korile, tumi ki hoise?”

²⁴ Etu chela he ase jun pora etu kotha ke gawahi dise, aru etu kotha ke likhi diya hoise, aru tai laga gawahi hosa ase, etu amikhan jani ase. ²⁵ Kintu aru bhi bisi kaam ase, Jisu kori diya, jodi etu sob kotha ekta-ekta kori likhi jabo koile, ami laga bhabona te kitab likhi bole etu duniya te jagah napabo.

**Indian Standard Version (ISV) Nagamese
The New Testament in the Naga Pidgin language of
India: Indian Standard Version (ISV) Nagamese**

copyright © 2019 Bridge Connectivity Solutions

Language: Nagamiz (Naga Pidgin)

Contributor: Bridge Connectivity Solutions Pvt. Ltd.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-14

PDF generated using Haiola and XeLaTeX on 21 Feb 2024 from source files dated 23 Apr 2023

302d590c-b57a-5734-9dcb-8a22ed7685c4